

四庫全書

集部

# 欽定四庫全書

集部

淵頴集卷三

詳校官庶吉士<sub>臣</sub>初喬齡

侍讀<sub>臣</sub>孫球覆勘

總校官編修<sub>臣</sub>王燕緒

校對官中書<sub>臣</sub>宋枋遠

謄錄監生<sub>臣</sub>薩龍光

欽定四庫全書

淵穎集卷三

蜂分

元 吳萊 撰

白日照我牖羣蜂亂飛颺胡然立國邑意各擅侯王細  
腰峙窟宅修股負糝糧搜尋百花叢吸飲靈露漿長雄  
據要劇孫子孕蕃昌班茅寧建社促隊欲殊疆秦年賤  
親戚強壯遽分張唐朝富丁口寬狹或徙鄉嗟茲大衆

內壹是爭鬪場物生豈不微翾擾迺其常龍伯數千丈  
巨軀果何藏鵠人僅三尺么麼具冠裳肖翹本殊異性  
命可比方中心苦見役外患復難防當時一割裂在處  
幾披猖枯椿寔酖毒突與發刀槍龍號聲殷雷虎鬪齒  
噬霜紛紜彼楚漢彷彿此燕涼螻蛄尚有知槐檀互相  
攘螺贏祝它蟲銜泥穴枯桑天機久已洩世網孰為綱  
委形混衆萬觀物詎能詳歲寒野草死寒菊弄餘芳羣  
蜂我爾恤矯首慨以慷



客夜聞琵琶彈白翎鵲

白翎鵲東海來十里五里何摧積一飛飛上青雲際再  
飛飛墮黃沙堆少年臂名鷹齊出跨駿馬放鷹一馳躍  
與鵲相上下身佩木弓射必命中中疊雙蹠血芟毛天  
欲雪摩雲壓草地多風衝突三邊有意氣指揮八極無  
英雄白翎鵲西海去千里萬里何軒翥一飛飛上賀蘭  
山再飛飛過鐵門關少年領強兵乘勝即轉戰戟頭吹  
火光旗幟舞秋練手持生鐵刀空城烏雀盡死麋麋鹿

瘡痍無處避角貓躑躅向人號收拾廣輪莫郡邑肅清  
星嶽靜波濤白翎鵲東海西海都驅廓太常召見日月  
出治定禮行功成樂作大雅清商久寂寥鷄鷄邏遶多  
弦索上林花開早浮艷榆塞葉落終迴薄一聲高一聲  
低一聲懾懾百虎豹一聲束縛千鯨鯢白頭漢士聞先  
拍青眼邊人聽却啼君不見康崑崙羅黑黑開元絕藝  
傾一國若還睹我白翎辭二十四絃彈不得

陳彥理昨以漢石經見遺今承寄詩索石鼓文答

以此作

橫山先生多古玩太學石經分我半魏公世藏資州本  
金石錄中還散亂當時愛奇巧收拾筆畫昭回映雲漢  
流傳到我乃不遠虬甲鳳毛真可惋自從得此未有報  
岐右石鼓天下觀昔則敲火今斷臼駱駝載歸石盡爛  
倉沮以後即史籀先代遺寶列圭瓚中郎變篆生八分  
二者不敵何足算先生嗜書出法帖青桐墜壁手脫擊  
漆書蝌蚪不通俗蛇蚓蟠結強塗竄先生博學抱聖經

焚膏繼晷日耽翫韋編鐵摘只紙傳鄒魯精髓合淹貫  
國子門開塵沒城蓬萊閣廢草堆岸春秋徒聞壁可假  
道德詎信鵝能換古今所重在周典周史面目極敷數  
聖心不死不在石日月行天旦復旦吾家故紙本不惜  
驪頷有珠吾欲鍛向來見辱亦云然焦尾之餘爭免爨  
先生安坐幸勿躁歲晚相逢笑拍案屏除許事不須說  
好與吾儒峙楨幹

小園見園丁縛花

我嗟衆草木高出陵雲端叢生或滿地品彙可不完山  
園我栽蒔作此小屈蟠龍頭何其蠢鳳翼乃若干胡然  
贊化育任意騁雕刻勾萌欲旁達節目終液櫛縈迴挾  
烟彩刻剝獻雨癘立身既不直生理寢凋殘春陽彼一  
時花發黃白丹歌謳雜舞吹酒炙盈柝梓歲晚忽焉至  
北風吹汝寒皮膚早蝟蝕骨髓慙枯乾聖人治天下萬  
國無不謹視民本如傷動植總相安刑名威雪電劒戟  
血波瀾廟堂苟失策閭里轉窮殫異哉彼園丁此况儁

爾冠人生但心勤若處得體胖我方即移汝前有蒼蘚  
壇世非郭橐駝何以垂鑒觀

題錢君輔紫芝圖

我聞錢子古丈夫早歲喪親伏墓廬血淚迸空百草枯  
神芝挺發黃土壚一莖三秀煜以敷圓釘寶蓋屹相扶  
醴泉灌注含膏腴紫雲覆護連根株山靈地媼侈厥符  
鳥啁獸躅助號呼削杖苴經麻布襦毀容惡服絕復蘇  
孝悌有王貫斗樞卉木榮華孝之餘里閭耆長起嘆吁

痛心疾首矧可摹夫孰非親堂上居日嚴祇敬本一軀  
夫孰非子膝下娛風樹悲撓弗待子愛生戚死自古初  
德鉅評帚俗易趨判分宦輿類向隅較計絲粟遽異儲  
被薪委壑餒鳶烏酣酒嗜炙醢枯杆衰雖在身孝已渝  
天薦厥祉天亦誣信哉純孝與世殊史筆值此合特書  
素冠所刺今不無朱草有神錫爾孤琅玕玉樹豈得如  
岱衡恒華五嶽都玄黃赤白擁趾臚列仙山澤或療臞  
瑞不為孝徒區區天寒歲晚霜霰踈慎終追遠在我儒

匪丹伊青繪此圖後有過者尚式車

題天台山張節婦卷

古人重首教夫婦係民彝自從初御輪禮有親結縭百年主家室中饋務倡隨溘先苟不待從一幸無虧世途日趨下貞節誰肯持於焉見管蒯早歲哭總帷荼毒守几席惡筭毀容儀旦夕執醢奠春秋動悲思病姑坐堂上躬養我庖廑稚孩倚牀側慈訓我書詩奉老當以終撫孤敢如遺白頭誓不爽黃土詎有知我生何惻惻我



死迺吾期惜哉歡娛際捐我少艾時鸞鏡塵已蝕錦衾  
淚還縑史管獨不煒春裳忍為私因之念三季似此實  
女師谷風或棄背行露且陵欺詠歌可勸諷開卷益嘆  
咨從來桑濮地不廢柏舟辭

題彭雲溪南安軍新建東坡載酒堂

南粵故墟篁竹鄉東坡舊遊海渺茫蠻山蜚水環為疆  
生黎熟獠共翱翔良辰勝日銜杯觴踐地茹蠶盤腥鄉  
前列荔丹與蕉黃峨眉英氣壓四方自來金馬與玉堂

豪邁絕俗觚牘將雄跨九州若毫芒唾視一世孰雁行  
顏駟寒剝白首郎趙壹坎壈抱飢腸天欲勞爾使望洋  
一身去國不得藏山川烟霧與耿光詩名道價極焜煌  
有美一人婉清揚俛仰陳跡闕新堂歲時桂酒醕椒漿  
飈輪羽蓋願蒸嘗和丘鳳鳥翼方驤汪野龍魚負鰲囊  
嗚呼使君漢循良嗚呼使君唐辭章高山景行屹相望  
一時短矣千載長超然被髮下大荒

貞女引記予所聞於蘭溪錢彥明者

北方有達者官守託閭閻一笑侍盥櫛千金得婢娟晨  
歌雲母幌夜舞荔枝筵春桃獨不艷秋柳遽無年於焉  
榛筭毀遂以櫬櫬遷音容詎可睹涕泣空餘連墓埏但  
未殉牀第更誰妍越鸞悲掩鏡齊雉痛鳴弦人子當盡  
道妾生敢移天手澤尚不忍家風豈其愆吾何惜吾軀  
汝懼辱爾先郡庭給過所江驛遞歸船郵兵即前防纜  
卒復後牽時時數釵珥處處閱索饘心堅務玉白鼻截  
愧瓦全指波著重誓抗節脫飢涎世故日已下民彞孰

能然狹邪情比絮桑濮步安蓮闕氏弄琵琶青塚俗局  
鏤昭儀出感業椒壁孽多羶况兹大丈夫自許古聖賢  
百行偶一敗反經欲稱權疇知生死間便見祭與淵吁  
嗟此貞女儻或繼史編

得大人書喜聞自賽音布拉克復回大都賦寄宣彥高  
一紙江南到屋扉高秋漠北奉宮闈金微駐蹕踰  
唐塞鐵勒鳴弮接漢畿繇最行朝因贄玉蹄林望祭類  
游衣明年草賦呈親去想像汾陰扈從歸

次韻柳博士五洩山紀遊

首路東岡幾屈蟠  
青天東峽望來慳  
林多鹿豕山為國  
瀑有蛟龍海共寰  
客子杖藜依樹石  
神仙樓閣幻茅菅  
吾知此處宜招隱  
詎減淮南大小山

日晚行呼野鶴羣  
山溪五級洗巖氛  
虹霓射壁從空現  
霹靂搜潭到地聞  
桑苧茶鐺遺凍雪  
僊藥杵落晴雲  
飄然早已同仙術  
老我曾探嶽瀆文

一點剛風削玉蓉  
仙山肺腑閱重重  
眼穿上界成官府

舌捲西江得祖宗驚嶺雞峰渾未到龍湫雁蕩豈多逢  
年來卧病吾環堵負却詩家九節筇

百越名山最阻脩遥空縛下紫金虬孫生隱在聞長嘯  
屈子騷成賦遠遊魚鳥從容還自得龍蛇混雜不同流  
自今便欲鑄崑石俗駕能來尚掩羞

方景賢回聞吳中水滂甚戲效方子清儂言

客來自吳土示我吳儂言吳儂歲苦水謂是太湖翻太  
湖四萬頃三江下流洩疏濬久無人淤汙與海絕東風

一鼓盪暴雪如頽城屋靡蚌蛤上畦畎魚龍爭嘉種不  
得入種亦悉爛死民事何所成食天俱在水富豪僅藏  
蓄官府更急糧貧窶徒斃餒妻子易徙鄉散行向淮壩  
隨處拾稻粟雖然遠鄉土庶可完骨肉東吳本富盛數  
歲偶凋殘世非欲繭絲官曷任虎冠國家自充實財賦  
有淵藪給復當我及安寧到雞狗何人講平準何人議  
河渠荒政固有典水利復有書龍蛇方未毆鴻雁尚在  
澤縱令可還定何計免溝壑何時水幸退我得列稻禾

水退泥盡出草屨更撈蝦我思告朝廷來歲不可待毋  
庸水爭地便放江達海客今聽我言我欲解儂憂所爭  
但一水民氣庶今瘳自從唐季來吳越無兵歲至于宋  
南徙淮蜀此都會大田連阡陌居第擬侯王錦衣照車  
騎玉食溢酒漿居然甲東南遂以侈濟侈培克自此多  
凋瘵亦以起天寧不汝恤有此水潦淫要令沃土瘠民  
得生善心豈惟生善心且用戒培克采詩觀民風願踵

太史職



題毗陵承氏家藏古錢

我觀泉志頗識錢古今錢品不一傳歷山鑄金史靡紀  
泉府職幣開其前五銖半兩日以變揄莢鵝眼爭相緣  
重輕子母信有制周郭肉好俱完全吾知聖人利世用  
要在百貨得懋遷農夫紅女致不易尺布斗粟儲為淵  
嗟哉後王弊自此竟使匹庶握利權剪皮鑿鑠偽莫禁  
執籤障簾慳稱賢國儲何當調度乏民食矧是齷醜先  
潛交鬼神欲著論臭衒富貴仍開鄧冶卒銅工各鼓鞮

偏壚盜鑄多煙燧一朝變通別改弊餘盡沉朽徒埋船  
承君好古此收拾寶玩有若編埒然大貝南金特畱厚  
玄圭博璧同瑛鮮漢官受一潔簠簋晉士掛百酣枯櫬  
白水真人笑有識上清童子猜非僊古錢勿用幸久聚  
古貨難賣空精甄時能撫摩却穢夢坐與餐濁收饒涎  
世間萬楮畏可盡牀脚一甕踏欲癩試看營室鑠星處  
何似揚州騎鶴年

送宣彥昭北赴京師

去年春風來我已送子兄今年春風來我復送子行大  
江多波浪雨雪塞路程老河貫梁楚汴泗割濁清梁山  
匯為樂荷藕欲抽莖漳流直達海葭菼莽縱橫飲饌去  
鄉異市逢寒食餽游從到處闊騎聽上林鶯帝都示四  
方賓客聚百城白獸耀戟戩紅鸞擁旗旌乍見須壁馬  
再談遽公卿終然鳳鵠集恥作鰕蟹并況子昔我學自  
期可俊英平時撫硯匣盡夜對燈檠古今更成敗舉舌  
即深評北南幾水陸肆意勿遐征子兄特精幹胸次有

甲兵被服抗俠窟躋攀接侯鯖笑披鷹鵠論條綴手所  
擎錯金琵琶槽絃索發奇聲二難苟若此何地不鏗轟  
貢生彈冠待王粲倒屣迎上書合自銜趣召使衆驚尚  
期施展間歸作閭巷榮嗟吾久抱疾望子但目瞠因之  
念吾兒遲子謁國黌吾兒早失學所至類孩嬰幸令得  
好友庶免謚愚氓前園川海棠紫蔓亂垂瓔起揮雙玉  
壺暢此孤劍情當知子願欲本不慕肥輕行哉自此遠  
谷口吾躬耕

白鼻騮

白鼻騮白鼻騮當軒迴立噴風沙名驥留良定北土蹇  
驂索價猶東家青松縛柳曉安阜紅錦裁韉春映草支  
遁心機愛神駿伏波骨力輕衰老去年禁馬無馬騎天  
下括馬數馬皮浮湛鄉閭萬事足笑傲品秩千金羈幸  
哉漢武重脩政往矣劉聰真覆鏡立防戰備要馬稀藏  
富民寰須馬盛向來河隴色為羣目極川原亂若雲庶  
人徒行未足恤世間醇駟何由得

宋景濂鄭仲舒同游龍湫五洩子病不能往為賦  
此

知爾能携一短筇寺前突兀定何峰九天管籥來飛鶴  
三島樓臺守蟄龍閒欲嘯歌先目往病嫌登陟轉身慵  
西源山石東源水豈但渠家有赤松

諸暨北郭潘節婦卷後題

天地昔立極聖人本有防辟之制洪水豬蓄以為常不  
然遽汜溢隨處恣披猖終將大節挽寢我舜倫傷南州

彼何人北郭得新孀盛年喪所天臨鏡毀舊粧春秋奉饋  
祀暇乃必蠶桑豈惟育稚幼抑且禮尊嫜尊嫜曰已老稚  
幼儼成行託孤生當盡從一死則藏乘時或棄背促嫁  
更衣裳疇悲膏沐容畢命松栢岡世人如輕塵風至即  
飄揚我身類完玉火烈愈燿光自來管蒯姿曾不異姬  
姜母寧窈窕者化敬著一鄉一鄉尚謂狹千載願不長  
吾其撫野草可但感嚴霜起操膝間琴彈作雙鳳凰鳳  
凰不再下寒月照屋梁

送鄭浚常北游京師

浚常浦江人其家自冲素處士綺至今九世同居人以一家三代稱焉

治世日少事朝廷正求賢信哉男兒志觀此萬里天一行本不易當路即翩翩親朋送糗糒從戒舟船自裁適時服年貌逞餘妍起吟俠游傳賓客務相先功名抗雲表氣槩貫斗躔心馳上谷塞望極黃河壩向來全燕地碣石遠相連只今帝王都閭闔儼在前嵯峨廣寒殿嵒嶮神嶽巔金陂水流雪翠嶼花滿烟楊柳十二街人家競鞦韆騏驎八尺龍官曹燿鞍韉熒煌許霍勢燦爛



春嘗權傾身漸風動炙手遽電烜奉書善銜鬻希寵巧  
攀緣匪文說禮律伊武學兵鋌牛毛豈不多麟角獨爾  
專屠狗或隱市探驪盍沈淵世方重孝義瓜瓞况綿延  
家規既建立門榜復旌蠲族居且百口僅指亦及千跡  
茲乃政令得不遺貂蟬吾知魯儒生文物但炳然美哉  
萬石君惇樸最可傳須令便繻棄勿直待硯穿歸乘使  
者傳踏却別時筵嗟予日以倦一夕三四遷病餘兩足  
弱無異變憐絃沼田徒欲疏服賈特輦牽里閭不過此

金匱要略  
卷三  
磨滅疇能鏤

喻東泉學道止酒自書止酒詩座右戲寄

何故欲止酒自吟止酒詞酒何負於人杯杓遽不持我  
雖不解飲見飲輒喜之何疑酒亂性屏去無醇醑乃言  
執道要危坐息奔馳行思駕羽輪久矣夢肉芝鳳鸞守  
爐鼎龍虎擅崛奇狂醒不我毒痛飲非吾師終然彼先  
酒昔者祀狄儀笑揮金巨羅倒著白接離常人溺妄境  
世慮動棼絲爭如醉酩酊得以混希夷神仙矧多幻狡

猶無不為遨遊市舍長調謔酒家姬唱歌便爛漫冠珮  
任傾歌吾知麻姑過解與陽都期惕哉學仙侶身若槁  
木枝云胡千瓢量政類斷乳兒歡伯却恨訴麴生亦嗟  
洛丹室尚恍惚醉鄉終弃遺萬一君上天酒星恐君疑  
抑且君得封酒泉併須移竹溪清風處栗里落照時二  
子豈不飲千秋長若斯

柳博士寄詩張如心朱仲山方壽父蓋憫鄉粉之  
凋瘁而嘆友道之寂寥也借韻和呈

憶昔獻賦蓬萊宮蓬萊聖人日月容雖隨賢材集北闕  
竟與隱逸歸東蒙朝耕暮耘但力穡羹藿飯菽空尸饗  
俗方同流見踽踽國有歷騁聞颯颯遨遊自知喜俠行  
學業何得親儒宗多年僅守薜荔雨昨夜寢感梧桐風  
私嗟泮芹幸可采况復鄉梓宜吾恭斷然祇覺洙泗異  
歸爾孰謂靈光同畧志皮毛馬埒貴賈餘角距雞塲雄  
似公講明特造理愧我篆刻真雕蟲前賢近曾數與謝  
大耋遠或傳淮龔典胄終推道德富銘功更許辭章豐

惟其草玄志準易肯以乞巧比送窮孫康雪紫敢我廢  
雷煥星劍須相從當今者英詎幾在獨不數載繫吾逢  
千里黃河屹砥柱一聲霹靂鞭羣龍

韓吉父座上觀漢陽大別山禹栢圖

大別名山如伏鼃大別古栢如立猱舊聞夏后手所植  
直輒南國無蓬蒿洪水曾當涿洞極聖躬乃此胼胝勞  
乘舟荆衡地可盡作貢雲夢天爭高一時栽樹託所歷  
千載摩撫繫其遭本根盤拏屹負負枝葉挺拔森旌旄

礙日吟風聳楚阻欺霜傲雪塵秦簷夜行夏首影弄月  
曉艤鄂渚聲吹濤信哉冥靈欲等壽材比拙幹終稱豪  
屏除菑翳虎豹泣鎮斷夔魍蛟龍逃匠石徘徊却喪斧  
篙工睥睨寧維舠吾知嘉木辨爾雅但惜芳草遺離騷  
平生環轍苦未到幸此畫筆何從操豈非神明護正直  
使在方漢雄城壕樓桑出牆尚久特巨櫟蔽社猶堅牢  
惟茲所重有聖德坐見餘物真秋毫自來劉李富宮室  
命下荆蜀刮土毛一榮一枯驗世道勿翦勿伐臨江臯

穆滿蒼茫黃竹詠重華慘澹蒼梧號  
逖然萬古萬萬古  
西望嘆息同霑袍

寄吳正傳

日晚天寒攬敝裘西南目盡澈江流  
養生有論空成嬾  
招隱無騷却好游雁鵠吟風燈照几  
蛟龍躍雪劍鳴鞬  
平生自笑飛騰暮幸矣心猶與道謀

觀莆田劉公掖垣日記後題

炎正昔中潰王者遂南服四明有史氏  
三世秉國軸人

君恩稠疊祖父勢熏煬傾家幾攀附快意即誅戮幸茲  
遭大變何苦圖起復雖然承天寵得不覆公餽諫官奏  
䟽上胄子伏闕哭所當終衰經弗許覲黃屋時惟我劉  
公草制方倬宿掖垣備日記宸聽煩再瀆相門恒出相  
耕釣亦可卜國事非家事孝忠同一躅北風吹天地滄  
海翻岳瀆浩也議不戰長江境彌蹙彼嵩乃弦張名閭  
將鹿逐夾攻既通使恢筭豈遺鏃指麾及燕晉洗蕩到  
瀍穀兵威偶小振相業竟難續晏安爾江沱顛擅我姑



孰人材遽如此王氣合終籙從來論國是獨不懼國覆  
蓋棺久自定荊棘忽蔽目望斷八公山功高九州督回  
首百年間遠哉遷固錄

樓彥珍北游京師予病不及往餞歲晚有懷并寄  
彥昭浚常

日晚北風起少年方遠游徘徊上谷塞眺望黃河流崢  
嶸十月冰朔色壓九州熒煌大明殿御道接龍樓時巡  
向灤水臘雪擁薊丘前驅鸞鳳旗後乘貂鼠裘尚食豐

宴飫教坊樂筦徒百官散城邑駝馬盡歸休自今帝王  
都想爾觀覽周却疑書傳間不謂秦漢優何家非許史無  
客不收鄒投輪即雨集揮袂遽雲浮東航扶桑隅西笮  
崑崙陬變化指顧異芻蕘立言收文物彼洛禊土音吾  
越謳私將竊祿志勇赴隨陽謀隨陽即澤雁竊祿豈梁  
鷺美玉獻劍珮精金鏤褱鞬出門亟裝束行路肯滯留  
布韋漫老耄鄉里惟田疇功名幸一遇螻螻尚公侯學  
問敢強飾黍稷待勑糧當令竹帛上直與先達侔毋使

螢燭光蕭然寸草秋嗟予久抱疾餞酒弗及竊念爾忽  
萬里征夢或見求宣生頗俊逸鄭子復綢繆趾高有捷  
步習正無昏眸早看拜家慶共許動宸旒傳車定不礙  
關鑰便若抽杏花開如錦楊柳滿陌頭去時小兒女來  
詫真驂騑

偶閱昌國志賦得補怛洛迦山圖

甬東東際控東荒蓬萊北界跨石梁天風吹來黑水國  
海雨灑過青龍洋寶陀山高此孤絕善財洞近爭巉裂

黃金沙土結香雲白玉樹花飄瘴雪扶桑島上接鯉人  
棋子灣頭望馬秦安期先生脫赤舄羲和女子扶朱輪  
晨鷄鳴聲日觀立老蜃樓臺潮候急釋迦方域舶船通  
娑竭世家宮殿濕君不見海人稽首扣海磯蛟鼉不動  
護仙衣紫竹梅檀何處所毗陵頻伽獨飛舞

送俞觀光學正赴調京師

崑崙東南禹九州山高海闊峙以流齊秦相龔一分丘  
梁魏何有真浮漚天邑當中控四陲先生去矣不可留

二十起家今白頭獨騎麒麟誦春秋我無糧食無車舟  
出門笑看雙吳鉤神氣化作青金虬大江有路通淮州  
汴河急下蛟鼉愁呂梁犇猘壓黃樓故墟荒草項與劉  
澤蛇臺馬一戰收東連鉅野荷花稠泰山鳧繹倚魯鄒  
北沂衡漳冰凌浮滹沱碣石帶白溝田光荆軻尚夷猶  
擲鼉屠狗何煩求天門蕩蕩開長楸日暮道遠吾驂騑  
誰歟遇者多公侯眼中勞苦問所由南土有客非常儔  
百年文獻尚汝優公車奏牘幸早投孔姬禮樂正旁搜

齊楚辨智虛前籌佐朝肉藿豈異謀庾信詩賦但雕鏤  
朔風吹塵織卉裘炕牀煤炭手足柔韭菹豆粥却滿甌  
真珠滴槽酒或簞伐狐燭兔進庶羞妖歌漫舞陳笁篴  
老當益壯在此游選曹已似執券酬皂鵬一飛卽制鞵  
先生去矣聽我謳悠然獨酌更馬周長安索米毋庸憂  
送宋景濂樓彥珍二生歸里

我生本孤陋偶到越江頭如何彼二子直泝越江流子  
來我欲去子去我仍留留子子不住送子使人愁我且

與子酒西風吹子裘問子何所學將通魯春秋聖心久  
不白聖髓空旁搜聖經但至正賢傳相戈矛晉臣忠如  
預漢士識有休發揮一王法褒紂五等侯經筵未可弃  
墨守或為讎我今豈謂能子幸與經謀嗟哉我何學半  
世成倦游焚膏正自苦奏牘不見收我迂世所誚我病  
我難瘳子何不即達說我東家丘我寧不及子請子更  
歸求毋徒挺咎堯亦莫變浮漚山鷄伏鵠鷖我尚與此  
侔勗哉敢不力前路無停驂

同陳樞壽登卧龍山望海亭却觀賈相故宅或云  
越大夫種墓在山上

昨日新雨已行登卧龍岡征衣忽我薄絕頂極寒涼鑑  
湖水自涸蓬島屹相望神鴉弄落景海蜃連扶桑前朝  
尚未遠列甸或稱疆王孫只草綠相府空蓮香高明豈  
有瞰土木竟為殃興衰一以變貴富何能常山靈司羈  
轍古隧閔兵防毋寧申楯棲卒使良弓藏哀哉大夫種  
直不脫劍鏐荒雲但墓穴烏喙却悲傷功成偶不退苦



膽不思嘗炙手既可熱重奎果何光史文幸明白忠死  
期不亡蕭然北風樹為攪鐵石腸

脈望

天地常育物爾何為蠹魚魚形不在澤蠹我萬卷書於  
茲亥豕間偶值神仙字咀穿以百餘變化何容易多應  
直如髮亦或圜中規天星必降氣仰望固不移惟人萬  
物靈耳目鼻口具曾不如彼蟲正由不學故童年便有  
習白首尚難精人書兩無涉物我每相爭誰具希聖賢

竟自雜部伍聖人不汝樂使作聾與瞽太虛但一理立  
造豈停機竹蠅因雨蛻橘蠹得風飛神仙非凡人物化  
乃罔測何哉我瀛蓬獨不掉羽翼張郎不解事強欲學  
神仙醉生且不悟夢死更茫然起看蠹魚形明月秋滿  
几汝母聽我歌笑倒抱朴子

同吳正傳詠龔巖叟小兒高馬圖

北平援臂久不候伏波矍鑠空持矛并州小兒十歲許  
雙足捷走真驕駟金鞍玉勒絲轡絡肉鬣風髮雪斷齟

郊衢一躍自矜驕血氣未完先躡蹠漢皇神武駕英雄  
西極飛來八尺龍城東關雞爾尚可磧外鳴劍吾無功  
初陽却照長楸道白髮奚官泣枯草悠悠翠蓋與鸞旗  
老矣驂騑那得知

浦陽十景

仙華巖雪

手倚晨扃一渺漫山神擁出玉嶺崦光侵道者祠星室  
跡破樵家斲藥壇石笋撐空穿宿暝天機織素掛餘寒

俄然喚醒西南夢怕作松州徼外看

白石湫雲

獨上南山最上頭朝齊一點便成湫巖腰動石風初起  
海眼輸泉雨欲流蜥蜴含珠光照夜靈霞捲鐵黑沈秋  
明當去挾騎龍叟直到扶桑第幾洲

龍峰孤塔

老眼前頭尺五天真龍角上正攀緣規撫白馬馱經過  
想像玄纓護塔眠梵唄將回知磬絕神珠欲墮見燈懸

何妨晏坐初禪界  
蟻蠓紛飛即大千

寶掌冷泉

乍撥山亭木葉堆  
老僧千歲喝巖開  
天從白石雲根出  
地帶青泥雪髓來  
竹影自深斜映月  
魚腥不到半凝苔  
世間夢渴知多少  
可待金莖露一杯

月泉春誦

古木叢中息世諠  
老生力學掩溪門  
危絃未絕人須聽  
蠹簡多忘我欲溫  
白兔流光分石色  
蒼龍擁沫驗沙痕

從今更浚源頭水莫待投膠與救渾

潮溪夜漁

昨夜寒潮與此通荒溪尚趁百川東  
行依柏樹林頭月釣拂蘆花嶼畔風  
插竹侵沙魚欸短篝燈映草蟹碣空  
太公遠矣吾將隱赤鯉何書在腹中

南江夕照

偶出官橋倚落曛詩家觸景漫紛紛  
彈琴在峽驚聞瀑罨畫為溪喜得雲  
竹篠晚深樵弛擔莎根秋短牧歸羣

道旁更有粉榆樹欲脫荷衣藉酒醺

東嶺秋陰

幾點晴雲著樹梢寒山蒼莽類城壕鷄豚日落聲相接  
鶴鶴風涼勢自高小徑殘榛分嶺脊平疇淨綠帶溪毛  
朝來雨足多秋意井上無人事桔槔

深裊江源

半遶山根但一窪真源鑿破杳無涯清澄灌或於陵圃  
窈窕尋猶博望槎積雨衝隄蝸自國微煙幕渚鷺專沙

欲行復坐皆雲水只屬騷人與釣家

昭陵仙跡

一掌嵯峨是玉京連峰欲向鼎湖傾高張黼座龍隨下  
靜擁珠輶虎獨行白雪松扉雙立影清風藥井倒吹聲  
長歌為問西王母却把荷花與送迎

雨晴

久雨雨不絕長嗟春暮時梨花一片雪楊柳但青枝日  
出散我步閒雲結幽姿山嵐撲小牖澗水激中坻對景



且歡樂逢年須軫飢蕭條併日食嘆息東門廩救菑幸  
亟救移粟將疇移吏商自有計錢虜渠何私物情正慄  
慄淫潦乃見欺空甌本汝舊美麥尚今茲我生頗好古  
當務獨不知毋寧坐復起得誦書與詩古人不我待去  
矣安能追我不識古人陳言果為誰撥書既自笑撫席  
更深思遯遯千載後此心誰我期

盜發亞父塚

楚王昔尊楚亞父楚人今發亞父墓南山鑿石下懸棺

寶氣燭天知劍處當年奉劍重瞳光左右膝走諸侯王  
劍鋒掃秦柄奪漢梁楚關作馳兵場起撞玉斗啖豎子  
戰肉烏鳶骨螻蟻烏江得死不得葬憤膽冤腸終不死  
東陵老盜曾膾肝丞相摸金仍置官大儒揮椎小儒唱  
奇寶拔窠蛟龍寒君不見秦皇一死驪山改亞父猶能  
數千載我今豈識亞父誰鳬雁秋風散銀海

劉龍子歌

劉龍子龍子出山龍母死一雙赤鯉騰來多玄龜獨戰

翻天河山頭種楓高不得楓葉落波秋正黑潛游蟹斷  
島無人飽啖蝦鬚汙作國巢湖龜眼看欲紅邛都魚頭  
闕為宮絕磴懸梁但一勺雲綃霧縠餘長風劉龍子龍  
子為龍猶念母栢江沼海歸何所硯中墨水吾乞汝昨  
夜蛇醫送飛雨

劉仲卿上昇歌

金華山金華山有古洞天遙問射聲何校尉憶從脩  
煉得神仙神仙之人本英傑老弱移家家洞穴乘輶曉

結芝草雲擊節秋飛鶴翎雪溪間白石齒齒嶺畔赤松  
無枝呼鹿不逢玉女收羊乃見小兒嗟洞高兮高若崖  
嗟洞深兮深若井中心一念能滅情夾脊雙闕遽朝頂  
七月十五神仙來天樂自響石廩開風伯吹塵萬萬里  
月光幻出瓊瑤臺玄霜寶露瀉一杯麒麟鳳凰兩徘徊  
上壽等天地下壽直到耆與台翩然被髮游蓬萊

簷下曝背聽客話呂安撫夏貴雜事

老翁曝日坐頭髮亂如絲歷言前朝事恍似震業時東

南立國久天子重西陲長江一戶限鉅敵千熊羆呂家  
好兄弟身擁襄漢危圍深救不至望絕但孤師戈兵空  
鶴膝部伍尚魚麗居民併習戰結束類鮮卑砲車燒樓  
櫓斤斧遽已施摧塲漫互市軍壘竟登陴夏貴本小校  
戎行早驅馳當街苦醉酒袒跣受鞭笞雙瞳夜照路面  
刺鬪鋒旗積功到大閫綾誥疊若坻沐薰乃得見感激  
有涕洟英雄頗用術血死矧敢辭上流忽以潰淮楚屹  
不支終同祖約走恨比劉琨罹蕪湖十三萬鉦鼓且棄

金史四庫全書  
卷三  
之人力不至此百年知者誰

衛將軍歌聞有得漢衛青玉印者賦之

昔聞衛將軍起自衛子夫姊為皇后弟為奴親提漢兵  
北擊邊旌旗劍戟羅熊羆指麾六郡良家子輸給三邊  
幕府租血流余吾斷斥堠魂駭老上燒穹廬天子召見  
錫印符璽歌騎吹凱入都推牛醢酒啓鞠室饗士論功  
懸箭筈平陽故侯丈二父寡主忸怩膝走趨兩兒佩綬  
光耀軀外虜內煽絕代無荆玉寸方溫且腴古文繆篆

姓名俱虎螭壓紐巧盤擎  
楯鼻磨墨急檄書史傳數紙  
丘山如王侯螻蟻但須臾  
土花苔葉空糝糊何人手曾  
秉鈞樞何人身已返隸孥  
昔貧今富鼠作虎昔富今貧  
鵠化鳬感時撫舊嘆以吁  
淮陰鐘室彭越趙良弓猛狗  
諺不誣衛青玉印千載餘  
珍重漢皇宏遠模

五洩東源有地度可十數畝  
後負山前則石河如帶  
幽窅深窈蓋隱居學道者可築室  
偶賦一詩屬

陳彥正

越中五洩古名山東源峻嶺空雲間老石峻嶒欲見骨  
天河瀉破莓苔灣蛟龍縮身似蜥蜴魑魅出沒司神姦  
雷公一聲忽下擊鳥跡不到猶重關青華仙真舊治所  
碧落侍從登清班穴疑綵綬據一柱戶想銅獸銜雙鐶  
鳳馭鸞鞭白羽耀芝樓茵閣朱莖殷梯梁未絕或可值  
洞府寢遠多愁顏嚮曾褰衣得揭涉別擬鑿徑通茅管  
寬弘頗占十數畝夏靜粗覺非人寰澗流帶綰玉繚繞  
巒翠髻擁花欄扁截斷塵埃與世隔構成棟宇寧吾慳



陳君尋常有道力況此跬步臨幽潺虛室光明白不動  
寶爐溫養丹將還丈夫出處我已定馳字早寄孤飛鵬  
休拘崑崙併漲海遇有勝處同躋攀

樓光遠家觀宋綬景德鹵簿圖

東朝盛文物四海極豐富粉飾郊祀間馳驅漢唐舊奉  
常夙有掌鹵簿列前後車輪麾飛黃戟盾服錯繡啓肱  
龍虎動扈衛鴛鴦鷺蹕嗟峨屹丘岳灼爚羅星宿陳兵金  
吾隊擇馬駒駼廐嚴須呵八神喜欲抃百獸祖宗所繼

承宇宙徧包覆上公敬執籙天子親獻酎靈光旂旗林  
緡典禮樂囿威儀一以整瑣碎無不究時惟正垂拱國  
幸息戰鬪玉策恐人聞帛書疑鬼授紛紜務欺阿制作  
窮刻鏤老幼咸駮犇穹示揔歆臭中誠迺根本外貌特  
膚腠封寧重碱繩饗或貴型留居安昧危機致治啓  
亂竇文華終耗財武弱益招寇雖然喧一朝孰得燕末  
胄五輅忽已沒三京杳難救惜其初討論盍不返朴陋  
臨風披此圖歎息我臣綬

雙林寺觀傳大士頂相舍利及耕具故物

古稠大山趨古原古寺突兀倚山根小溪前流未及渡  
白塔崛起高蹲蹲傳公故宅奉香火厦屋萬間周四垣  
梁朝到今數百載兜率說法天中尊世曾出世役妻子  
家或漁樵隨犂犍道冠儒履忽一變胡膜梵唄爭駿犇  
蕭衍老公坐玉殿捨身建刹開祇園花幡亂飛欲滿席  
拍板歌唱聞槌門雲光靈異竟何有仇督怪神寧復言  
藕絲袈裟上所賜奇錦照耀扶桑瞰龍宮四萬八千卷

寶藏一轉百鬼掀貝多遺文白氍毹像經律論疏洪其源  
黃羅繡褥裏頂骨舍利五色摩尼燉一牛眠雲已化石  
雙鶴覆雨仍軒騫却風吹地日漸壞樓閣樹林無半存  
青檮並聳碧宇上落葉散到人家村浮屠仁祠始自漢  
文蜀華蓋何翻翻梁時佞佛特太甚宗祀斷血徒饗殮  
父兄子弟且學佛絕滅恩愛生讎冤臺城矗天或死守  
邊騎乘輿直游魂幸灾樂禍却環視入室操戈攻嚙吞  
蠟鵞厭埋家難遠烏慢囚辱兵氛昏人天小果豈不有

宇宙缺鑿疇能藩一朝佛出救不得滄海攪作黃河渾  
傳公家居自天屬時復耕耨不憚煩朝廷聰明顧不及  
塔廟湧出如雲屯長干空迎佛爪髮滿國欲飽民膏腴  
羣僧無功併仰食我佛獨不憂黎元惜哉後王永不寤  
前後喪亂同一轅後民皈嚮復未已拱手禮跪駢肩跟  
呪口波瀾豈祝蟒禪心寂默猶拘猿終然百欺幾一遇  
世俗瑣瑣吾何論

題方景賢護法寺壁枯木竹石

山從崑崙西北來北經黃河積石到碣石南亘青城峨  
嵋幾萬里南嶽山頭夜見日縣聯崛起惟天台絕頂下視  
東海如一杯仙奕壇開纖篁掃雨嫋嫋碧神丹鼎冷老  
檜拔岧號風叱雷就中片頑皮凍骨老石塊勢若千百  
歲後突兀偃蹇角起相礪山人前身本在南嶽祝融峰  
下住踏上天台石橋看瀑布東峰月上學寫影山精野  
魅哀號涕泣愛惜枯樹白道猷拄杖拄開蛇口起不得  
蛟子龍孫盤旋糾結塞滿行路硯泓一滴淡墨水漲作

玄雲黑雨歸無處  
槎槎牙牙蒙蒙茸茸  
蜻蜓翼薄但如  
穀螳螂臂硬欲張  
弓盤根錯節蝕倒  
千尋檣櫟麤枝大  
葉蔽殺三尺蒿蓬  
崑崙山前回龍顧  
祖有此勝絕景蔚  
藍天上天光照著  
下土境界缺缺齧  
齧不辨西東東海  
老仙笑上面桑田  
海水桑田翻翻覆  
覆眼曾親見  
秦皇漢武脩宮廣  
室盡寫巴蜀材大  
如梁柱小似薪樵  
何常識遍帝令混  
沌七日死天下盲  
聾見草悅見豺戰  
未聞神龍有力時  
飛入長安城中戴  
宮殿

金華山游雙龍冰壺二洞欲往朝真洞晚不可到  
金華三十六洞天高崖巨壑多風烟老石斗甕寒鳴泉  
蠻花鐵樹森戈鋌鳥獸絕跡鬼魅矚清境竄窳巢神仙  
虛泓齧趾蠶頤然怪鑿郭落闢屋揚涼飈倒鞬喻欲穿  
凍乳冰髓偃就船熒光燭真竹炬難積蘚躑躅踈却趨  
危棟結宇深局鍵曲房密閤極邃延困倉斂穢列町嚅  
拋架韞捲冠裳懸鐘樂鼓簋屹不遷彩霞寶蓋爛瑛鮮  
蜚幢舞節恍後前垂龍天矯角鬣全穹急艷絡蛇白以玄



後頭象脚伏獼猿蟾蜍蝕月囚重溱靈霜霰雪凝真鉛  
靈溪流潺截中邊秘穴漆黑跼背肩神闔峻拒亟我旋  
暗井瞰腹抱豁圓仰竅斷緇矚或顛妖蛟產暇滑吐涎  
冰簾洒空萬琲聯馮夷海國瀝為淵窺覘欲下手足拳  
悔懼咋舌恐有愆咎其奧室別據巔蔦蘿藤蔓亂糾纏  
蝙蝠翅股掛復翾蜥蜴弄電窟宅專梵質蕃飾垂蹣跚  
寶纓珠珞窮雕鏤精英象物得氣先上踞下伏總一甄  
獻齒磴陟絕愁攀緣嗟予學道苦未堅起褰昌陽望延年

乾堪坤輿自方寰稟生受有吾拘攣羽毛鱗介正或偏  
飛潛動植過百千宮居竈食類螳蜋酸醎淡澁朽臭羶  
揭鑑照面益削腴運劍剖腹猛滌滌貪羸畱厚務死權  
息黥補劓吁誰賢我疑神仙住渺緜黃庭鬱璘內景烜  
芙蓉城闕麒麟軒蓬萊樓閣魚龍鞭服閭賣瓜俗骨痊  
道華啖棗彭仇捐白河炤耀踏斗躔滄海攪碎觀桑田  
盍獨閱此使世癩我卜我筮還筭喝開二洞薄八埏  
翩然直駕鶴與鳶

景陽宮登初陽臺謁抱朴子墓

人生擾擾間頗覺天地窄我憶抱朴子高臺睨空碧初  
陽出山上照破萬古石丹光動鼎鎗霧氣浮冠舄遺書  
上下卷道妙或黃白老衰及病瘦辛苦為形役豈伊鳳  
鸞姿終以狐兔宅尸解本無形肉飛寧復跡鄭君曾有  
傳勾漏恍所歷降子倘可問稚川特未隔幽林來魍魎  
缺井守蜥蜴神仙果何人海岳長戲劇世傳老聃死吾  
謂方朔謫虛墳誰所為怪樹獨悲激滿前湖與山秋色

落几席因茲些爾魂目送雲邊翽

大佛寺問秦皇繫纜石

手撫一片石昔為滄海濤始皇或繫纜萬里浩無津世  
間本妖妄何處有仙真蓬萊不可到弱水空飈輪徐生  
忽以去方士先避秦童男繼童女五穀雜貨珍島嶼止  
不返蛟龍化其民非惟長年藥永隔戰馬塵人君却未  
悟望望轉東巡山鬼覺將死海魚祠作神侯生奉圖錄  
譏諫極所陳驪山悶鳬雁金柳竟沈淪惜茲鑒不遠遺

跡留千春經營大屋覆刻斲青蓮身漢唐幾英主覆轍  
猶爾遵我恐石有語神仙多誤人

湖北岸小寺問參寥泉

古寺湖水上寺門但菰蒲一泉湛如玉巖骨旱不枯粵  
從參寥鑿得與蓋壤俱東坡或茗宴西嶺猶松筭人誰  
問詩侶世頗笑酪奴瓦甃縱然在木瓢知己無汲古宜  
汲深塵心非轆轤別禪勝別味俗舌空醍醐老僧久不  
識香炷冷宿盂卓哉郡太守遺像擁眉鬚閒來試我酌

霧雨變須臾尚持金芙蓉便踏赤鯁魚

戒珠寺後登戴山謁王右軍遺像

小立天地窄前登萬山阻越王采戴處秋綠空榛莽古  
祠復何人遺像寄梵宇柳老題扇橋荷香弄鷺浦典午  
當衰亂神州渺淮楚經略欲馳兵保障期按堵姦溫多  
大志誕浩却浪許護軍曾參綜牋疏極心膂廟謀不可  
勝野戰徒爭武内外未協和英雄豈豪舉泗口聊進屯  
譙城遽犇沮事勢日趨異朝廷孰撐拄去官寧忤違誓

墓獨酸苦父子但法書功勲總塵土青緗每收拾綵筆  
餘圖譜草隸俱入妙雲龍競掀舞崔蔡須抗行羊殷特  
奴虜一驚或有識野鷺紛難數平生破布被漫以指畫  
肚起扣故墨池長鯤戰風雨

射的山龍瑞宮問陽明洞天洞蓋是禹穴

意行得古洞忽到陽明天人傳是禹穴愧我匪史遷上  
摩青冥出湧作芙蓉巔下開巨石窟鬱以藤蘿纏自昔  
乘四載於茲理百川岳瀆通脈絡蛟螭被拘攣手真長或

可待宛委空風烟衣冠竟一窆簡札猶遺編世間後百  
世龍鬼巧相挺安能洗滌盡却見鴻荒前惜哉不可及  
恐此復偶然黃庭或秘景絳府尚靈仙精英倚怪木狡  
獪戲神泉無論鳳文鳥肯降狐鳥筵長嘯望天末白雲  
年復年

次韻胡仲申雲門紀行

會稽多名山乘興我欲去忽携一日糧便踏青蘿路前峰  
如鴻鵠後嶺類鵠舉吾知杖藜間肯負鞋襪句有湖但



一曲天影餘秋宇有涇曾載樵石齒亂逢午紺花吹澹  
香琪樹動幽慕何哉廓落洞得不精靈聚長吟空人我  
曠視渺今古候神軒轅久藏簡宛委暮老簷雲倚龍丹  
焚雪凝乳詩亭了如初筆塚將化土閒挑苔窟泉靜熬  
栢爐霧荒涼相劒客錯寞賣扇姥紛其塵跡改恍爾烟  
霏護起追千載懷高縱太遐步私嗟勾踐世保國深且  
阻膽新苦或嘗犀練勇如赴復疑始皇時刻頌岑絕處  
鮑臭尚求僊蛇妖徒泣嫗沈埋九寶鼎笑傲兩芒屨交

子支道林侶我許玄度興亡鳥呼風富貴鬼嘯雨穢墟  
幸有遭盤谷誰爭所行從簣簣徑坐泊菡萏浦白鶴杏  
未攀紫騮驕可伍搜奇本自茲濟勝吾已屢秦崦或西  
枝郢江猶北渚鏡虛忘往來輪轉繫成住平生幾心期  
終夜真夢語桂棹方招隱芝蓋不樂瘡身尤出處難地  
以窮通悟一日須見羅四鍬竟如樹推材宜鄉里選德  
因庠序脩名實之賓慎動靜有主人思佛可佞我謂儒  
非腐山岳何屹然事功急先務執輿且周流沮溺却問

渡信茲我孔孟直不老鄒魯遠游吾爾俱滄海極東汭  
韓蘄王花園老卒歌

蘄王手種紅錦花十載不掛鐵鉞鍛花園老卒守花樹  
睡著花磚聞曙鴉白頭白盡身無事古塞沙塵戰餘騎  
多士如雲足健兒一奇在腹終憔悴青銅萬緡滿地光  
寶函矯節賜夷王宮粧粉豔去酣酒海貨珠賸歸壓檣  
王家舍兒驚吐舌御府珊瑚碎飛雪口猶乳臭却帳前  
矍鑠一翁嗟棄捐君不見天下英雄本卒伍左鼻成龍

右鼻虎頸血淋漓思釁鼓史傳沈埋誰比數  
花落花開幾風雨

觀姚文公集記趙江漢舊事

江左一丸國北兵臨鄂城鄂城小不敵圍塹泣孤婢趙  
公本儒士皓首困機槍老身念未死勢肯舉降旌坐隨  
清野民虜入驃騎營淒其盡忠義憤使釁鼓鉦長揖上  
堂階五弦偶鏗鉤黃鬚何鮮卑拍下尚正聲中原真有  
人大將世豪英幕府喜致汝軍師豈徒驚終然類脫兔

夜即奠鯨鯨兩目嗔欲裂汨羅我同貞和門遽出令邏  
卒復縱橫扶持返舊路慰勞賜冠纓古今多分潰光嶽  
極戰爭干戈自有責黼皐合裸京演疇庶不憚經瀆孰  
重輕從知道在己詎用死易生汴土久不守金源遂交  
撐紛紛戎馬間務以儒術鳴遺經益南徙義理却後睦  
繁章僅北往禮樂要抗衡平陽賣瓜叟立教繪國鬻詩  
書得箋疏江漢畀律程當時乃世運何士非我楨楚材  
仍與晉漢學特逃羸藏斂或徵氣鼓篋須播精熒煌一

王事卓犖千載成陸機但辨語庾信空衰情我且用我  
法吁嗟我仁卿

讀穆天子傳

我聞昔日穆天子身騎八駿走萬里左驂右服疾風起  
盜驪山子為之使巨蒐鵠血飲至齒王母戴勝被奇詭  
海山燭銀爛光燬赤水瑤池望盈咫白雲歌謠樂忘死  
西極化人形慮徙清都帝居騰廼止日月河海眩遠邇  
變幻疾徐過一指積蘇累塊恍不峙室宮狐鳥饌螻蟻

夢虛覺實知者幾跼天踏地焉可恃嗟哉穆王造厥理  
詩人祈招著本紀秦皇漢武晞逸軌燕齊術士從風靡  
目熒耳聾狹聽視攻齧皮膚遺骨髓蟠桃花開照海水  
生不諧樂死空誅稟生受質鼻口耳插牙戴髮肩股趾  
織毛緝纊鬻苧泉馳騁快意恣游履明瓊擒魚發笑喜  
彈箏酌酒鏗角徵天真自然絕增毀上摩青冥蕩若砥  
剛風倒景列星畧下臨厚壤疊若壘桑麻冠帶際龍鬼  
一身筑子等粟秕四維上下劇迤邐園居繫處奴隸比

束貧縛病動牽掎蜚揚恨不鳥兩翅跣蹈恨不百足豸  
浮湛里閑曷時已顧瞻形骸吁可鄙我披我書我欲褫  
思為穆王執鞭弭泰山滄海步我跬歲月邁矣我博髀  
游俠者非仙者是流蕩忘返獨不耻長筇化龍几化麕  
芝草琅玕森茂蘿我來丹臺述仙史泛觀八極從此始  
滿天白月無塵滓


題畫墨梅

北風吹倒人古木化為鐵一花天下春萬里江南雪



題趙大年林塘秋晚圖

老景青黃筆底收晴鳬冷鴈共汀洲  
王孫畫學空花竹  
惆悵銅駝陌上秋



淵穎集卷三

# 欽定四庫全書

集部

淵穎集卷四

詳校官庶吉士臣初得齡

侍讀臣孫球覆勘

總校官編修臣王燕緒

校對官中書臣宋枋遠

謄錄監生臣薩龍光

欽定四庫全書

淵頴集卷四

元 吳萊 撰

古屏上宮人戲嬰圖

我愛古宮掖宮堯凌碧空美人拂旦起殘月愁簾攏小  
鬟捧香立飄作烟霧濛弄嬰偶一笑舞鶴遽來同新花  
正炫畫側手碎繁紅亦有雙蛺蝶踉蹌撲深叢豈其聖  
賢書行墨曾未通儼然袍笏具意氣早稱雄云胡歎汝

內但取華厥躬塵凝孔鸞扇繡威鸚鵡籠紛紜爭旗鼓  
出入雜冠童凡諸戲玩物色色各論功太平忽已久天  
地迴春風能羣禮序鴈絕妬詩歌各常嗟汝齒壯得不  
苦乃公却令十六院弗及少從戎心知一以瘡鼻息徒  
長虹世故多變易家居果癡龍惜哉歲月老千里吹蒿  
蓬為撫腰下玦烏啼洛城東

粵山白鵲陳彥理同賦

粵山白鵲何氤氲今所驟見古所談滿地蓬蒿出復沒

凡禽豈或同鳩鷯如何天然有此潔直以日浴無餘黔  
金精煉成向月窟縞夜飛過凌霜潭靈須駕河恍若一  
靜欲繞樹驚能三玉白藍橋質已玳霓裳水殿神猶酣  
休徵不使畢弋得異羽未許樊籠諳性耿終隨處士傳  
音和盍趣彌陀龕鴻雁塞門但鄉北鷓鴣裸壤空思南  
晉人禽經此或載蕭氏瑞志吾將參情知太古至德世  
謂巢可俯驚可探投詩與君且一笑幸勿緇涅令渠慙  
夜聽楊元度說宣和內宴雜事

北風吹庭柯秋士慘不悅頗懷炎德衰一旦幅員裂當  
思付畀重但孕驕淫孽中宮日沈湎內伎增舞列聖人  
自鳴箏丞相齊按節奇花入網運法酒從流歎畫圖恍  
有見帷薄知甚褻亂寧迴波奉賦豈好色設君心既已  
蕩國步驚欲蹶妖狐空獻顰倖鼠不塞穴坐令汴河冰  
變作燕塞雪玉鉉乃一震金甌可無缺由來治亂間一  
是興亡轍豐侯早著戒褻如竟為厲乾坤獨不大甕盎  
相起滅於茲聞十愆得不仰前哲

寄喻國輔張宜之

手挾殘編只蠹塵山林著我最閒身  
槁梧可據瞑須熟華黍雖亡補欲真  
危坐但看燈作暈遠游還覺臉生鱗  
相思正是多風雨滄海無涯可問津

檢故庾得故洪貴叔所書李鐵槍本末寄洪德器  
天地昔未一朔南遂分疆中原久喪亂白刃皎如霜  
李全本崛起手挾但鐵槍山東數十城叱作古戰場  
茫然即斷指設誓如剗羊一朝與旌節正面將假王  
云何引



盜賊遽爾升堂隍豈其弱能立當彼驕則亡日落山海  
暗羣龍血玄黃陳安偶從晉侯景徒禍梁於人欲使詐  
在國須謀長大福豈無妄佳兵終不祥誰令送死處竟  
以抱甲僵漢盤忽已折周鼎那能常吁茲撫舊墨我涕  
徒為滂俛仰千古意悲風嘯枯桑

讀漢武內傳寄戴仲游

我問學仙子神仙何所求翩然王母使特降五城樓白  
雲起復滅丹掖戒涼秋黃麟雜赤虎旌幟鬱蚺蟒上元

三角髻聞命亦來游玉女列左右容眸眇如流神光乃  
上燭衆樂發空謳益易尚可化奢淫直難抽從知扶廣  
受或用栢梁收五嶽形已秘靈飛籙仍幽母將剗爾命  
但欲返諸柔一洗狐鳥俎長辭蟪蛄丘向時恍有見方  
士殊悠悠平準暴海內發兵困遐陬琪花倒景瑤草  
遍玄州終成泄道要寢使增愆尤鄙夫忽自笑頽俗奚  
其媮機關出鬼域利欲生螟蟲崑崙一萬里得去那能  
留為爾遣此什塵簪早須投

同喻國輔題人溫日觀蒲萄

佛者本西域蒲萄亦來西奈何此善畫無或渠所携我  
曾考其故初與漢使偕上林乃有館蔥嶺何須梯天時  
自不同地氣忽以迷結子且磊磊縣藤更高低先幾日  
已露薄德不及稽終令白氎像遠從雙狻從茲故國  
木伴爾禪家栖幽心恍有得爛墨研為泥宜哉一揮灑  
遽若無町畦依稀可少辨變作天投蛻萬古空朔色南  
山竟朝躋畫工尚逸品游戲徒筌蹄豈伊吾無人何往

非耄倪豈伊吾無物桃李總成蹊此皆外所產敢與中  
州齊為爾撫此卷長歌欲驚嘶

歲晚懷戴子壽就寄翁君授

東南大海吹長波亂山幾疊堆嵯峨我所思兮欲如何  
戴子謂我不我過四明學官列象儀書則稽古詩猗那  
六經聖髓工漸摩倉頡字林考隸科青燈掛壁豈有他  
黃蘗苦澁餘醎平湖沆瀣足芟荷目力可及發詠歌  
慈溪先生雙鬢皤小出乃為禮所羅曲臺淹中却不頗

孺齊道真得者多先生昔曾舉漢科我亦同往超江河  
仰窺天門光可劇豁然叱落千丈坡就中乖龍卧為梭  
掀雲噴電輸蛟鼉呂梁懸水無盤渦况肯遽數蟹與贏  
彼哉貧女凝秋蛾地窄袖短空傿傿却鐘毀金不必和  
靈談鬼嘯衆所呵北行何有塵沒靴南歸詎可夢駱駝  
一朝竟撤碼碯珂獨立吾今衣薜蘿芝殮竹飲皆沉痾  
十載未復仍委蛇先生一再來揮戈坐將挾箸嘗其臠  
大松偃蹇徒高歌小草樂育尚菁莪清廟梁柱可墜磨

萬世學術從丘軻文風自振祛煩苛士論况辨化與番  
分正句讀嗟吾訛丘園歲暮猶婆娑明當沐髮陽之阿  
從公共飽天山禾更不去理墻頭莎

浦陽舊有明月泉久而不應今乃䟽道其源似頗  
與弦望晦朔之間相為消長者遂作是詩

大區何渾淪元氣乃潛洩忽然為山水無往不融結遙  
天偶一照厚地空餘冽盈將光共生涸與魄同滅玄機  
自消長至理誰圓缺發揮雖有在窺測尚未決枯查曾

幾棲斷沃遽中裂半倚嵐翠雲微通海潮雪昔人來推  
求於此得表絕虛亭奚其敞靜愁獨不齧歲年竟悠遠  
沙石漸填咽寧加䟽瀚功肯使見聞褻恍疑合圖經環  
坐到稚耄倘非蟹投碕幾類鮒處輟纖纖浮晶彩湛湛  
浸寥泝舊觀方爾還真源可吾蠲爭言彼月行豈為茲  
泉設蕭丘胡長寒漢井或再熱逝尋白兔公直探神龍  
穴狂歌水仙詞擊碎如意折

吉祥寺

一昔逢寒食行吟採物華風生敲檻竹雨濕墮船花曲  
塢青龍樹長灘白鷺沙回看江上水直去到吾家

病齒

我生本多病一瘦恒踣踣試問玉隴君何為忍吾苦自  
其初齟時排次已不伍每聞編貝如方朔僅虛語信哉  
骨之餘所託車與輔舌神乃中居猶賴汝疆圉有身竟  
攻殘元氣徒齟齬毋庸蠹斯蝕尚謂剛可吐尋常薄滋  
味勢不勞吞咀麤穀及硬餅錯列空匕俎豈伊類門樞



金匱四月全書  
卷四  
不動固先腐軟靡幸能殮梨栗稀復睹我思天地間民  
物總胞與爾自本屬吾安能遽秦楚齟齬或更生華池  
仍發乳常擬真我師為說養生主今年吾壯強三十逾  
六五更後三十年零落何足數起呼白驢公堇酒且酌  
取誰歟劉師服高詠聊戲侮

王濬南太山石室

我將呼巨鼇滄海欲掀播於茲玉帛淪遽使金甌破兵  
氛塞中原卦氣協大過誰封函谷關便掃太微座長矛

左右盤勁矢五十箇歌鳳幾能來跨驪吾得堊當其一  
手麾豈止千夫和力須坼老拳事且居奇貨真儒雖有  
材用武竟無佐青雲飛遐心白羽洒寶唾撫時乃紛綸  
結客仍轆軻人生足窮通世故更弔賀熒然凍霧中仰  
見明星大宜哉泰階平返汝雲壑卧專門尚吾醇致弊  
徒爾菱既為梁鴻逃復危龔勝餓從知大耋嗟肯以淫  
威挫汶淚且泣岐聞風猶起懦潯河自波濤石室今堀  
堞寥寥紆我哀苦語不成些

樓光遠出示先賢圖像及漢季石本雜碑

世人不好古我獨思古先居然圖像間得見古聖賢遠  
之或千載近亦數百年精神果何在面貌猶爾妍凡民  
一其生覆幬乃同天紛紜日就滅委棄隨烏鳶矧茲丹  
青筆巧類造化甄惟心却不死匪繪尚能傳豈伊來玉  
壘仍似畫凌烟衣冠從代改俎豆與周旋前人後所哀  
後者復為前輟轉哀未盡蒼茫但長川我今已後古古  
碣空餘鏤水石久欲泐蛟蚪起相纏當風遽墮淚詎減

峴山巔庶以名德在終為日星懸

寄陳生

落日未落山崢嶸我所思兮抗嶄巖豈其徒行固不可  
亦有健馬可著銜胡然獨處不我即坐以魯史攻訖誦  
更疑弄筆發古帖先漢廢碣求鏤劖於茲孰不我傾倒  
但或嗜好殊酸醎結交似子乃有得肯使繫屬非存終  
今年一出本浪戰滿地插棘疇能監鹿盧大劍區冶鑄  
靈鬼夜泣蛟龍函早是鉛銛不我辨彎弧底用窺榮攬

縱爾奇文聚怪鵲正如絕力鞭神臧邯鄲道上尚故步  
我要我襟空餘纖母寧容刀與墨水枉使衆口相為讒  
秋風吹江晚正急薄暮徑去懸蒲帆自期共作制勝策  
酷類田父收盧象杏花一色直不遠繡線巧感行春衫  
黃精苗枯不足惜白木敢負吾長饒嗟哉鹵莽又滅裂  
但有萸稗無人艾待教將投乃壺哨猶恐未陳即鼓儼  
參乎賜也必貫一曰啖曰陸俱通凡尋常可力自不力  
不畏天顯蕪民甞子來不來我亦別深褻深處多松樹

臨篇草草遽報我愁思滿臆何庸緘

寄相仲積求觀鄭北山雪竹賦并畫卷

古人不可作雪竹有奇思鄭公詠騷詞或者攻繪事向  
來拈筆間才士巧相值誰從歲寒窺便得瑚璉器東國  
正擾攘靖康更無二上天忽同雲大地惟朔吹玄陰知  
已凝積羽忍不墜狂曾鵝炙求困及蟻漿饋離明乃煌  
煌勁節特一致秦關收甲兵蜀閬擁旗幟每疑一寸心  
長挺千畝翠學行尚吾時窮達等墨戲相君本彌甥年

耄常拭眚自應守遺文重襲在篋笥滿山蒼竹林凡本  
總顛顛因之寄君詩為洒懷古淚

西域種羊皮書褥歌寄李仲羽

波斯谷中神夜語波斯牧羊供別部當道剗刃羊可食  
土城留種羊脛骨四圍築垣聞杵聲羊子還從脛骨生  
青草叢抽臍來斷馬蹄踏鐵統垣行羊子跳踉却在草  
鼠王如拳不同老飫肉筵開塞饌肥裁皮褥作書林寶  
南州俠客遇西人昔得手褥今無倫君不見冰蠶之錦

欲盈尺康洽年來貧不貧

同方子清觀管子內業

之人東隣居為發架上篋吁嗟管夷吾遺我以內業古  
書本少見古道給不踰遺文久灰燼瑣語特枝葉為儒  
每更端務學多涉獵遠馳盍求心近眩將失睫紛綸諸  
子間變亂聖王法百家各為主一理寧足攝彼哉所施  
教何得不我協士鄉自宜然伯政吾甚捷當其解而因  
豈謂射中脇利源魚鹽開兵武劍戟接私疑聃莊言或



混孔孟牒鬼神通幽與詩禮借光摹操存性情常食飲  
精氣浹於焉霏天人不獨滕齒頰楊朱說力命列子道已  
雜管氏役權謀聖門詎容躡茫茫大江流可望不可楫  
朝來有微雲却倚青岌嶮

陳彥理有漢一字石經云是王魏公家故物予得  
其六紙蓋石文剝落者大半紙尾猶存蔡邕馬曰  
碑字

先聖去已久世傳惟六籍後儒各專門穿鑿多變易蔡

邕在季漢章句正指擿八分自為書刊定乃勒石太學  
諸老生講論頗充斥遠方競來觀摹倣無不獲東京忽  
喪亂盜賊恣跳躑古碑四十六兵火空餘迹熹平歷正  
始洛土重求索衛侯師邯鄲三體精筆畫煌然立其西  
學者常嘖嘖史書竟差舛一字幾不覲北都如遷鼎西  
國類藏壁砥柱或淪亡隋宮猶作碣於茲特隸科早已  
等瓦礫寧知一字遺不與中郎隔唐人試書學小學發  
光蹟魏公蓄紙本六紙忍捐釋模糊千莓苔糾結萬蜥

蜴聖文空往燼聖髓尚餘瀝粵從秦以來儒術經五厄  
到今厄者幾日月愈輝赫甚哉石為經爭似經在壁此  
石不獨存吾心竟誰惕

和陶淵明詠貧士

長吟望天地宛轉無所依豈不有達者窮櫛少光輝此  
心未能信何力求奮飛生雖百夫特死共一貉歸行尋  
靈芝草不救歲晚飢去矣甌石竭焉知溝壑悲

大道忽已喪翻然念羲軒今我去之久十年躬灌園存

者耿日月餘如飄風烟身名易汨沒文字勤磨研磨研  
何所事先覺有遺言揚朱談力命列子亦稱賢

山日淒以夕起彈綠綺琴清哉積雪曲自昔無知音世  
間紛且擾貧與憊相尋春江變作酒野鳥令人斟敝衣  
時所棄華駟衆爭欽不有丈夫氣徒為行路心

上天無停曜日月會降婁山林少過轍二鳥鳴相酬亦  
有五采鳳飛來為岐周姬公世不作白屋多懷憂逢時  
倘一用華士非吾儔函谷空逐客傳巖乃旁求

人生自沈靜豈得非意干宜哉揚執戟三世不徙官窮  
冬無完褐盡日止一餐美片終不獻晨曝尚餘寒手種  
老松樹蒼然霜雪顏正爾有佳思清風吾掩關

舉世尚馳驚飄如風中蓬上書爭眩鬻言語自稱工誰  
歟持清節乃見楚兩龔黃塵隨手掃白月與心同有榮  
方覺辱無屈豈求通誓追遼海鶴挿翅以相從

少小負奇志常思觀九州垂成捨冠冕去結巢許儔朝  
餐秋柏實夕漱醴泉流長貧士之常獨往非我憂求馬

但得骨尚能千金酬日望芳草長毋煩怨靈脩

望會稽山

自我行至越因之成越吟會稽乃巨鎮雄拔天東南東  
南誰開闢大禹世所欽外夷島嶼接支子祧廟臨磬斠  
或聲諫標橈惟力任收功黃能化畫道應龍深衣冠千  
年寔玉帛萬國沈荒烟專車骨落日望狩心盛德蔑以  
過遺祠尚茲歆渤澥斂餘漲蒼梧分遠陰前迎蓮花渚  
後擁竹箭林猶迴剡曲棹肯鼓玉門琴秦皇舊時輦散

亂何可尋欲去不忍去追遊更表今

次定海候濤山

悲歌忽無奈天海何渺茫放舟桃花渡回首不可量南  
條山斷脈北界水盡疆居然清泠淵枕彼黃茅岡朝滲  
日星黑夜淒金碧光蹲虎巖倚伏鬬雞石垂張磨礮越  
湛盧盪汨吳餘艤函波視若畝巨壑深扶桑招徠或外  
域貿易叢茲鄉嗚呼燕國語真倒龍文囊方物抽所寶  
水犀警非常驅鱗作旗幟駕鼉為橋梁似子萬里眼徒

倚千尺檣稍疑性命輕終覺意氣強寄言漆園叟此去  
真望洋便携學仙子被髮窮大荒

登岸泊道隆觀觀有金人闖海時斫柱刀跡因聽  
客話蓬萊山紫霞洞

客舟半夜發舉目流滔滔倏然風萬里誰謂水一篙幽  
島不可辨亂礁出如鼇侵晨始登岸身靜心實勞小徑  
連沮洳玄扃閱蓬蒿彈塗爭走穴傑步擁朱轡怪花絡  
璀璨陰木森蕭騷東都昔奔潰南海紛戰艘簷楹偶潛



伏部伍爭遁逃將施攻城火尚見斫柱刀黃屋祛曉侵  
翠華濕秋濤運往龍蛻久人來鶴飛高曲巒迷丹鼎清  
沼燭鬢毛母煩踞龜殼自此辭盧敖

起行海東洲重險忽已渡由來產神奇正為孤絕故幽  
芳窄客搜脩螫高螯赴荒烟淒暗潮旭日照晴樹似聞  
蓬萊山去此特跬步蟠根屹中立發乳森外護紫氣蒸  
作霞玄浪激為霧古穴通若輿靈文讀不句赤玉舄者  
誰黃金闕何處常疑方士說未省仙子遇芝草空漢廷

鯨魚壓秦路彼猶莫能得今我獨何據馮夷開水宮禦  
寇控風馭從渠指虛無此計恐遲暮

次韻姚思得

日子北渡黃河淵春秋大法孰敢奸讀書未成復學劍  
徑去有若脫兔然少年結束多紉綺酒酣擊筑忘宮徵  
浩歌揮淚望諸墳千載玉龍吟不死中州小住交游絕  
夢落蓬萊天海闊垂螭倚石氣猶雲老蚌凌波光亦月  
逢人浪說文字場久矣相馬悲驪黃薜荔紉衣白谷裏

蕙葭拂棹滄洲旁  
荒塵滿眼誰知己  
子獨來看能徙倚  
試裁五色絺繒紋  
機杼無聲幾寒女  
涼風鵬鷃高復高  
力掃培塿增崑崙  
仙槎一往劃河漢  
肯踏人間金背鰲  
夕泛海東尋梅岑  
山觀音大士洞遂  
登盤陀石望日出  
處及東霍山回過  
翁浦問徐偃王舊  
城

山月出天末  
水風生晚寒  
扁舟劃然往  
萬頃相渺漫  
星河白搖撼  
島嶼青屈盤  
遠應壺嶠接  
深已雲夢吞  
蟠木繫子纜  
扶桑纓我冠  
寸心役兩目  
少試鯨魚竿

起尋千步少穹石塞行路怒濤所縱擊徒以頑險故卓  
哉梅子真與世良不遇上書空雪衣燒藥迺烟樹玄螭  
時側行鵠鶴一迴顧從之招羨門滄海晝多霧

茫茫瀛海間海岸此孤絕飛泉亂垂纓險峒森削鐵天  
香固遙聞梵相俄一瞥魚龍互圍繞仙鬼驚變滅舟航  
來旅游鐘磬聚禪悅笑撚小白花秋潮落如雪

長嘯山石裂我今在東溟游日出重徼塞衣窮絕徑奇  
氛抱珥赤遠影摩空青想像暘谷水徘徊燭龍形晨昏

相經絡稚耄不得寧豈若柯斧爛看棊了千齡

遙觀杳無極宛與東霍隣悲夫童男女去作魚鼈民紆  
嶼尚餘聚蓬山寧爾神古棹苔駐跡仙枰竹祛塵短褐  
徒為拂飛槎邈難親好携支機石去躍織女津

笑揮百川流東赴無底壑青天分極邊白浪屹為郭弁  
裳或時來椎髻亦不惡投珠鮫人泣淬劒龍子愕海宮  
眩鱗縷商舶豐貝錯盍不呼巨鵬因風泝寥廓

老篙迴我舟沙嶼晚烟起蒼茫魚鹽塲寂歷鼓吹里人

民悲舊主歲月祀遺址終損玉几研不救朱弓矢東西  
八駿馬今古萬螻螻此事如或然須湔會稽水

我行半天下始到東海隅水落礁石出中飛兩鷁鵲情  
知瓌奇產勢與險阻俱在夷豈必陋雖聖猶乘桴吭風  
丹穴鳳尾雨青丘狐幸隨任公子不愧七尺軀

初海食

乍秋冒重險增我愁恨端故人喜我來為我具杯盤盤  
中何所有海族紛攢攢盲風吹衣慘蜚雨洒席寒春魚

白如刀小棹凌碧湍淡菜類山結互鑊就石剉水母或  
潮捲蠟蚌乃泥蟠蛟鼉惜不得況問龜與鼃其餘亦瑣  
碎充此一日歡洗濯烟瘴氣磨礪沙淤癥非歟嗜土炭  
否則殊醎酸珍須壓狔鸞異且輕馬肝褻味分罩網腥  
涎雜瓢簞奈何齊魯邦徒設邾莒餐對之輒棄置誰謂  
吾腹寬川澤禮當爾勿云行路難

望馬秦桃花諸山問安期生隱處

此去何可極中心忽傷悲亂山挿滄海千疊壯且奇信

哉神仙宅而養雲霧姿雕鏤鬼斧缺刮濯龍湫移坎宮  
森立劍槎枒割靈旗微涵赤岸水暗產瓊田芝老生今  
安在方士不我欺經過燕齊靡出沒楚漢危挾山作書  
鎮分海為硯池殘花錦石爛淡墨珠巖披東溟地涵蓄  
北極天幹維玉舄投已遠桑田變難期誓追凌波步行  
折拂日枝羽丘杳如夢玄圃深更疑豈無抱朴子去我  
迺若遺空餘煉藥鼎尚有樵人知

次高橋觀張循王戰處



日落見烟火江流秋漸清高橋足舟楫小浦連茭菁尚  
聞父老語前此盜縱橫悲心北嶽狩洒淚南海征疲民  
挈衣避義士嚼血爭叫囂無人境隙突七十城磨楯掃  
急檄擊銅持短兵病巡魚麗陣窮消伏弩營水犀怒且  
武風鶴遙傳聲發揮銳鼓曲申畫帶礪盟文石班不紊  
黃金鼎重撐漢儀整以暇唐室尤光晶搜箭已林薙泊  
帆仍陸行舊廟凋細柳新田滿香秔豺狼久息闔閭兩  
空餘驚奇哉第一戰永激萬古情

還舍後人來問海上事詩以荅之

去家纔五旬恍若度一歲豈不道路艱周流東海滴故人喜我返來問海何如所經何城邑相去幾里餘我言始戒塗尚在越西鄙隨波到勾章滿目但積水人云古翁洲遙隔水中央一夜三百里猛風吹倒檣初從蛟門入極是險與惡白浪高於山神龍習以躍似雪復非雪倚檣欲上看舟子禁不可使入舟中蟠尋常重性命今特類兒戲信哉昌黎言有海無天地掀掀終達岸鹽鹵

間黃蘆人烟寄島嶼官府猶村墟水族紛異嗜魚蟹及  
蟣蠅我寧不忍餐救爾相吐沫荒塵栖予髮旭日照我  
身似聞六國港東壓扶桑津或稱列仙居去此亦不遠  
蟠木秋更花蓬萊闕真館我非不願往此險何可當天  
吳有牙爪出沒黑水洋於奇豈易得似足直一死方去  
徒自驚既歸亦云喜珍重故人言勿以險為奇茲行已  
倖倖慎勿疾乎夷雖然此異鄉固是難久客聖出風且  
恬時清海如席我猶愛具然恨不少淹留爾毋為我懼

遭此千丈虬試看塵世間甚彼大瀛海衣裳日沈溺篤  
舫相奔潰奔潰孰能救沉溺將奈何口呿舌不下聊為  
故人歌

夜讀魏伯陽參同契

大道如大鑄人誰撞寸莛奇音一以振俗耳焉能聆伯  
陽崛且異真契垂光熒文詞信博瞻緯候兼通靈收功  
水火鼎泄秘龍虎經玄象既自育化機那得停金砂漸  
合質玉液初流形鴻濛鑿巨竅太一臨玄局易繫本覆

謬闕睢仍丁寧孔子或尸假文王猶夢齡庶聖雖不語  
神仙豈徒冥下愚等蠕動塵骨多羶腥彼殊不我即異  
學遂蝗螟夜寐恍一接晝思轉拘囹八石搜燥烈胡麻  
擷芳馨漢祀窮五時秦游俯滄溟非麟尚絆足類鳳甘  
笈翎似此期不死哀哉幾時醒鄙夫亦素隱妙語思黃  
庭勿為兩高第偵倒迷日星徘徊化鶴柱想像屠牛劓  
茯苓儻可煮笑倚長松青

去歲留杭德興傅子建夢得句云黿鼉滄海賦龍

馬赤文書間以語予及其鄉人董與幾山空歲晚  
恍然有懷為續此詩却寄董

觸目懷招隱興歌託遂初俗塵多汨沒天籟幾吹噓晚  
景翻濛汜秋潮洩尾閭祥雲旗鳳鳥瘡雨弩鯨魚洒淚  
鮫人室漂魂建木墟龜鼉滄海賦龍馬赤文書上谷空  
豪舉西河久索居蠻琛遺翡翠魯價掩璫璆遠矣鳴髀  
箭悠哉薄笨車影搖青薜荔光璨白芙蕖自昔攻佔嗶  
于今載耒耜彈冠身有待鑄硯志非虛蘇子從橫術韓

生內外儲乾坤瞻魏闕日月夢周廬炫耀螭雕珮踣蹐  
隼建旗裂衣騰朔漠膠棹入黃淤趙女絃鴻鵠奚兒駕  
駉驢詞林應聘汝俠窟肯愁予結騎幽并窄論交楚越  
踈竒功生鼎鼎猛氣死蘧蔭藥物金鷲採兵鈴赤鯉漁  
中條分雍豫四序出堪輿小榻琴心展長纓劒膽舒按圖  
稽獬豸醕酒笑鷄鵒野屐偏求蠟山巾尚著綵貧猶思  
祿仕老不廢畊畬卓蹕才終用猖狂習未除文章同一  
默歲月或三餘榮竹登玄圃然藜問石渠定須追樂毅

端為謝曹蜍

得杭州書聞虞紹宗新為文學掾歸建安

起紆千里懷雲物轉寥邈想像閩嶠間虞生寔超卓自  
云後雍公光彩動南朔昔曾郎孝廉今乃掾文學私悲  
窘時命念欲從先覺詞章竟韜晦意氣終堅確栽培信  
梁柱剪截徒楹桷準繩縱不頗斤斧虛加斲大將比伊  
周小或希管樂母然櫟社散亦勿牛山濯猶思浪奔走  
豈料俱屯剝搜林拔鳳毛掠野剝麟角舂撞航大河聲



金匱要略卷之四  
確屐喬嶽麻衣半塵土綵筆紛電電驥馬恒苦飢蛾眉  
復謠詠心迷燕士金淚盡楚臣璞彼賢猶簞瓢雖聖且  
獵較長疑返舊隱稍見蒙新渥泰壇禮尊彝清廟歌篇  
箭行乘德輝下遽忍雞驚啄貧居予辟羅友道爾蘭約  
青燈供繆悠白屋許敦朴才疎世不用達者譏數數有  
暇姑治田相看在帷幄

杜鵑行

南山北山啼杜鵑杜鵑花發山欲然千枝萬朵惜未得

中有一抹巴陵烟休說銅梁并玉壘搖蕩春光餘淚水  
五丁鑿路少人行石鏡生塵妖骨死東風青鳥來何處  
中宮移植銷魂樹不如歸去便歸家誰其友者揚州花

題韓蘄王湖上騎驢圖

秋風泗水沈周鼎淚濕吳天荊棘冷黃河北岸旌節回  
信誓如城打不開沿邊撤備無人守蟣蝨塵埃生甲冑  
散盡千兵只童騎餐來斗飯空壺酒西湖楊柳烟波寒  
照見從前刀劍瘢宮中孰與論頗牧塞上寧知無范韓

事去英雄甘老死此手猶能為公起勸人莫問故將軍  
身是清涼一居士

夢巖南老人

文章餘耿先耆舊日僵卧晝思見其人夜夢如識路恍  
惚疑尚存蒼茫杳難據青山真隱淪縞髮老韋素脩名  
可千秋狹世空旦暮何哉白玉埋肯有黃金鑄從知蕭  
散姿已是神仙具閭闔摩日月蓬萊拂雲霧玄鶴來頡  
頏赤虬下馳驚車輿清冷風糧食沆瀣露憐予此流落

愛我終游豫云胡縈苦心曷不縱遐步巖香返梅魂嶺  
物輸桂蠹鏗其弄琴書儼若陪杖屨淒涼枳棘叢寂歷  
芭蕉樹我淚無處傾荒江自東注

山中人

白日出復沒胡獨勞我生所務在卒歲朝夕強營營當  
春治農器土脈亦瘠盈薄言藝黍稷庶以觀其成涼風  
一披拂場圃如坻京凍戶猶畝首康衢或歌聲於茲尚  
不給野有菜色氓母寧拾橡栗起視牀頭餅

貧賤素所有豈辭辛與勤清晨腰我斧往伐西山薪高  
巖屹巨壑蛇虎氣逼人衣裳既不完出入在荆榛日日  
一接浙釜甑恒生塵白石幾時爛青烟空滿隣家徒四  
立壁冬令方行春亦有僱伶子脩然為世珍

歲晚筋力倦長歌守窮廬塵函散縹帙且復少嘯嘯文  
章信小技世故交相驅撥書置牀上我豈為蠹魚自從  
童習之白首愈紛如卓彼先聖人欲開後世愚文繡豈  
不佳輿臺同一軀但當樂道義肯恤吾身癯

去經十數里霜露淒枯田蓂笠既挂壁枯棹亦倚垣相  
從盡隣曲言笑仍喧喧惟此老瓦盆酒漿稍羅前奈何  
不解飲而喜鯨吸川有如善酒人觀者乃在船寸心久  
已醉雙眼方醒然世俗正馳驚悲哉東西阡

仙華巖麓尋釋子若空不遇

仙華山高高岌我峭壁攢峰飛欲墮之人辟世此結廬  
林末蕭然見烟火來穿綫路一何危擁出蓮宮茲亦夥  
青鮮生堦本不芟白雲著戶元無鑱麋鹿能游侶豈非

鷦鷯易足巢應可泉經巨石沼分聲花亞脩篁簷映朶  
屈伏心機入幽險安排位置歸平妥私隣海鶴相頡頏  
竟類春蠶自纏裹鄙夫多病每栖遲奔走十年增坎壈  
徒思一枕學吐納甚似同川譏袒裸紫芝舊曲歌尚憤  
黃獨長鑱種仍憤功名欲達擬烹鮮道路雖遙寧駟跛  
晚彩凝霞谷倚筠朝光出日潮移柁信哉神仙最踈曠  
悲矣習俗真叢脞當今大隱招已久或者玄居到還頗  
云胡虛室却栖塵矧肯縱談能炙輠糾結蛇蛟翠走根

熒煌火齊香懸果假饒人境不相關題破芭蕉知有我

畫馬行

涼秋八月霜皓皓白鴈驚飛散蓬蓀川原蓄牧萬馬來  
揚鬣攢蹄斲枯草漁陽突騎自有真奚官翦拭傾城闥  
素絲結轡美無價繡罽披韉驕向人當塗奮擲森崛壯  
一旦紛騰入天仗父老東城接鬪雞稚兒內苑隨調象  
煌煌京洛鳴和鈴犇走萬里如流星筋力追風烏鵲厲  
精神噴霧蛟龍冥往年踴躍將一跨寂寞而今空見畫



黃金鑄式猶崢嶸多少地上騏驎行

秋夜效梁簡文宮體

無奈涼夜永起登樓上頭鵲翻金殿宿螢近玉階流梧  
桐老葉恨芙蓉新蕊愁婕妤團扇上那得不驚秋  
曾是昔年寵如今誰與同秋獵長楊苑夜幸猗蘭宮瓊  
杯香泣露翠袖薄禁風將心與明月流入君帷中

柳博士自太常出提舉江西儒學來訪宿山中

一掃空山鹿豕蹤車如流水馬如龍黃魔法仗知宸輦

青史勲名問景鐘宣室受釐端有召曲臺傳禮尚為容  
少年作賦將投獻東北孤雲是岱宗

尚有歐曾舊典刑森然人物照青冥身從北闕攀燕桂  
夢壓西江食楚萍萬里毳袍春值雪千年龍劍夜占星  
此身恨不輕簷笈的的根源在一經

送俞子琦赴鄱陽却寄董與幾高駿良李仲羽

昔子泊京都逆旅無所館柳侯教國子子實同里閨泊  
君中外姻辛苦託螢案聊希邯鄲步共洒臨淄汙北風

吹老榆青莢落零亂流來金水河一派春波渙上林始  
罷獵萬姓方縱觀畫車挾緹騎衝突何可算故人我董  
生曾是秋闈冠相携高李徒往往妙辭翰當場許英俊  
與國峙楨幹雍容講都俞潔淨稽象豕心懷有道徵跡  
逐交游散豈非泛駕材中路乃羈絆去矣江上居蕪葭  
渺無岸幸君捧省檄而此莅侯類尚應念爾祖文采殊  
煥爛儒科既衰然閣職仍宣贊直將遠猶告慎勿細娛  
翫焉能尊瓦缶反不用圭瓚卓彼九臯鶴長鳴知夜半

毳毼吾羽毛踴躍在雲漢

柳博士出示太原鬱金江陵三脊茅汝寧蒼草

柳侯往京國十載却歸沐自言守奉常朝夕近黃屋乾  
包暨坤涵上下俱滲漉從知敬神人豈止蕃草木鬱鬱  
本晉產始裸已芬馥菁茅楚所貢既奠酒以縮靈著上  
蔡來五十備一束九疇乃稽疑初筮曾不瀆恭惟當宁  
聖永錫中國福廟堂有垂紳邊境無折鏃禮經官並舉  
宗祀物皆足陟降儼如在馨香薦惟肅夏后列包匭周

家用圭玉方脩四時祭定取柔日卜八佾陳羽籥鸞刀  
割騂犢郊丘遞云講柴望隨可復幸茲敦孝理久則變  
風俗似渠不世見焜耀驚我目猗那特不墜綿蕞何煩  
錄太平此其符有暇發汝犢

江南曲寄周公甫

東風吹人千萬里青蘋花發前湖水江南女子木蘭舟  
却採蘋花泛流水水流花發春光好失時不採花應老  
年少吳儂歌懊惱白晢容顏半枯槁倏然來矣雙彩鳬

化作汝烏穿雲衢汝珮復解江妃珠龍宮蛟室本不隔  
相期更有瀟湘客

鞦韆行寄趙季良時趙留京邑

京城寒食來沽酒城北城南映楊柳人家歡笑踏鞦韆  
杏板絲繩相對懸宮錦翻衣真富貴俗軀走肉盡神仙  
徘徊宛轉當風立春晚多風吹汝急鞦韆已墜蹴鞠空  
華鑣翠鞞擁青驄軒轅臺前日月近無終國裏山川同  
遠方羈旅紛馳逐燕趙佳人美如玉燕歌趙舞歡未足

去年芳草今年綠

讀諸子

嗟嗟文后師下及周公政豈待戰無為戎衣天下定

鬻子

何年守藏吏默默與道居玄牝不死青牛空著書

老子

大道終自然王家始多難益人不在賢卜鼎年已半

文子

不仁為人害仁反愁我身毋為小堯舜有愧猖狂民

亢倉子

不忘中帶鉤解縛堂阜下徒知領一鄉劍戟試狗馬

管子

徒聞處士議未有救時功為賢倘不尚淪沒草萊中

慎子

同異既莫辨堅白何由分徒將惑三耳驚倒平原君

公孫龍子

真夢本非夢萬事蕉下鹿力命每相持御風身乃足

列子

其書雖瓌璋其言乃參差自齒百家學仲尼何可欺

莊子

用兵捷如神四國莫予侮宮中斬愛姬取勝在柏舉

孫子

勒兵既有令處戰豈無權事功不見世徒說尉秦年

尉繚子

儒服說兵機愛兵如愛子能勸魏侯德終隨楚王死

吳子

人仁國無功人勇國無法名實兩俱存何從操賞罰

尹文子

節用禮益奢非攻戰愈多堯舜病博施其如兼愛何

墨子



陰陽或為雷天地豈無厚身殺道不行竹刑果何有

鄧析子

稷下三祭酒蘭陵陳詭詩剛道人性惡坑儒將自茲

荀子

小夫太多端秦法日已變咄哉文武都在德不在戰

商子

羈臣用密策身死不得保意將取邯鄲宗國已如掃

韓非子

子思言仁義不愧素王孫王風委戰國賴有壁書存

孔叢子

淮南招九流好道不能一空讀方士書寧知左官律

淮南子

法言準論語三世不徙官草玄固自好美新良獨難

揚子

三光正分裂世士有不遇雖通百家言尚著六合賦

劉子

續書不到秦元經猶數魏徒操虞氏琴孰識河汾意

文中子

瑣微論之妙歎歎哀之深五代干戈際千年鄒魯心

齊陶子

荔枝行寄王善父

炎雲六月光陸離人在閩南餐荔枝荔枝日餐三百顆  
紅綠亞林欺衆果絳羅繫相蠟封蒂尚食擎盤獻青瑣  
涪州歲貢與此同意欲移根來漢宮天生尤物不用世  
沾洒蜚雨吹蠻風蠻風蜚雨振林藪西域蒲萄秋壓酒  
勸君莫近楊太真傳說驪山塵汙人

明月行寄傅嘉父

上天有明月來自滄海東  
蠻潮夜捲馮夷宮海門一線  
驚欲射江面樓臺聳千尺  
冰岸雪崖屹不動水犀組練  
皆勦敵越人喜汭技已殫  
明月光中吾得賞飛來白鶴  
晉清角跳出長魚漢踈網  
北風吹起蘆花秋笑撫錢王  
鐵箭頭襍衣枕斧此何處  
烏鵲無枝空繞樹

寄張子長

世豈無推挽人誰有典刑  
稍懷南國彥恒愧北山靈  
萬

里麻衣敝千年竹簡青義文先索象魯頌或歌駟杞梓  
儒林挺魚龍俠窟鯉塵埃結綠粉黛飾娉婷脫略蘇  
張弇漸摩管樂矧道途餘雪屬巖穴但雲局本擬陳三  
策吁嗟守一經蹤卑淪燕雀蹤遠及榛挺種菊行荒援  
看松俯絕陁仙棋閒度日旅劒懶占星故里青桐巷雙  
溪白鷺汀交游多握手歲月此忘形志氣需來哲才華  
壓妙齡秦坑收末燼漢粕浸奇馨正器陳籩豆專門識  
鼎鉶犇騰鞭用駮袒裼剖分脰卓立撐喬嶽孤流混濁

涇鵲飛時或布鯨吼扣非筵別袂逢秋怯隣燈入夜熒  
沈沈猶在野憲憲欲揚廷舜殿瞻儀鳳克階數歷莫螭  
坳文錦褥獸闥紫金釘列徽環霄漢游車發震霆細書  
官命史吹律樂求伶迅奮君須競栖遲我未寧簷風歌  
警枕井雨泣羸餅古陌垂楊柳空山老茯苓只今馳尺  
楮何所問南溟

二月六日雨書都城舊事

燕南趙北吹黃塵九天宮闕生紫雲十二門開衢路直

畫輪驄馬多行客，歲寒殿外柳纔青。  
金水河邊冰尚白，雞人傳漏放曉朝。  
文石分班押百僚，南陽近親最舞蹈。  
京兆耆舊爭歌謠，教坊供奉飾玉女。  
鐘能鐘聲鼓能鼓，錦來西蜀被玄駝。  
肉出太官殮猛虎，初日扶桑稍照人。  
內廷錫宴杏花春，沐犢駢牲泰畤時。  
祀鸞旗翠蓋驪山巡，東風萬里飄寒雨。  
我昔所聞今不睹，快然呼酒傾一壺。  
茂陵徐生曾上書。

姑蘇臺歌寄方養心

姑蘇臺南閭闔開姑蘇臺北鴻鴈來春花秋月幾時好  
步屧尋芳去如掃冤胥憤血空海潮老凜妖糴又烟草  
少年為客誰我令千里汝猶談一經黃龍挾舟夜有雨  
白虎司劍天無星山中菖蒲十二節未肯落盡青頭髮  
姑蘇臺上愁殺人身在勾吳望於越

遣兒諤初就學

起攀青桂枝高蹈素所仰嘗言天下事歷歷指諸掌滄  
海杳無波泰堦真有象辛勤餘十年盍不愧吾黨童髻

向予曾稚齒已在襁儒術云世傳聖功要蒙養豐邑務  
詒謀宋苗寧握長遠游且或非多學肯汝強薜蘿衣相  
結沙石劍可礪於心苟深造舉世獨不賞薰風昨夜至  
韶樂鐃遺響音邈然懷古人我豈久榛莽

觀梁四公記

奇士自古有我聞梁四公來從何處所遂到大江東舉  
朝無留難當宸亦動容胸襟狹海嶽舌頰翻雷風發揮  
衆女國充拓扶桑宮巨鶩產駿逸靈貂披蒙茸非歟沈



淵鼎或者射日弓至人倘可遇天地那能窮孔姬著禮  
法羸漢流橫縱淫辭一以詖幻術紛如逢螭齊人頗志怪  
晉室餘談空豈其羈狂紉猶謂得象龍洞冥久不作神  
異將無同吐哉衆耳目千載多盲聾

書宗簡忠公家傳及部曲記

勢極崇必圯天方獵元元兵甲暴草野大河為塞垣倚  
歟我宗公往作汴北門蕃戎斜曳戟盜賊望風奔老羆  
尚當道力攫氣欲吞四顧萬騎集中嚴一旗尊吳越僻

且遐梁宋仍屋完誓迴龍頭憶身屬豹尾韃周鼎沒未  
獲魯戈揮轉昏居巢有死憤駱谷無留屯一二遺部曲  
東南却軒騫猶撐半天下少救千丈渾雞鳴夜舞劍邈  
矣逝與琨於茲讀公傳義士古所敦

瓊花引重寄方養心

揚州瓊花天下無揚州明月照江都青鸞縞鳳何翅翅  
神仙司花不委地瑤宮玉色空彩侍十里殊簾溫春淚  
東風半夜吹城郭梁宋山川一盤礴冰懸雪積不改柯

二十四橋餘水波揚州瓊花人不睹揚州明月來無所  
世上繁華我不知揚州芍藥猶傳譜

哭妙觀上人

試續高僧傳之人又寂寥降婁星野近印度雪山遙頗  
憶連牀夜相逢補衲朝名詮披梵度妙趣挹詩瓢鹿苑  
千年振龍宮一念超舐斷看上界收涕隱南條玉塵懸  
青壁金環攪素潮松花香雨熟栢子縷烟消入觀占流  
注持齋洗血骨慧刀中寶劒禪樂裏雲韶日月蓮珠轉

塵埃氎像飄交穿秦嶺屐夢壓楚江橈榮竹曾幽石煎  
茶或墮樵病從天海窄愁向歲寒凋古澗猶泉水荒園  
但藥苗黔婁衾不足靈運笠空挑土淨隨心得池灰付  
劫燒斷磚開士塔飛瀑應真橋已矣成長往悲哉擬大  
招向來吟息處秋氣日蕭蕭

婁約禪師玻瓈瓶子歌秋晚寄一公

玻瓈瓶子西國來顏色紺碧量容枯老婁禪師澡身處  
秋水浸空菱葉開大身無邊小無碍天地山河等塵瑱

收藏霹靂歸沈寥束縛蛟龍作澎湃浮屠善幻本犁鉏  
同泰佞佛多衣冠壺公樓宇猶魂夢媚兒網運絕胝癰  
北山杉檜定湎室梁皇肉眼徒屈膝松花玉露洗還香  
栢子金烟熏欲漆靈璨閣前逢一師手親傳玩到今疑  
尚箴膏肓起廢病稽首乞師楊柳枝

昭華琯歌

咸陽宮昭華琯白玉琢成三尺短美人南國遥輦來齊  
謳趙瑟巧盤迴洞房更衣待月上音伎逐色穿雲開天

光搖地勢動山林冥海水湧奔騰萬騎壓城破錯愕雙  
矛鏖敵悚臨洮舉杵送役夫碣石挾弩射鯨魚泗亭夜  
行老嫗泣蘄澤秋戎妖狐呼一吹吹向樂中變再吹吹  
作寰內戰天教漢祖見還驚可惜秦皇驚不見豈伊伶  
倫解谷法鳳鳴節節足足久無聲豈伊後庭伴侶戒亡  
國壁月瓊枝樂不得自時厥後日淫荒立部坐部陳絲  
簧花奴羯鼓打漁陽祿山舞馬登舞牀昭華吹秦不吹  
唐嗚呼昭華落何鄉宋沈尚及萬寶常何如聽風聽水

金史卷一百一十五  
卷四  
奏伊涼悔不去問龜茲王

古俠客行

長安天闕制九州河北列鎮類諸侯私劍縱橫常滿路  
錦袍結束耀珠韞初月三更動千里紅線女郎勝男子  
金合書名斗柄高繡幃被髮心神死使臣單騎急叩城  
唇齒兩河休用兵帳前盜賊在隣道陴外旌旗無硬營  
浩歌置酒紅線去夜叉飛天渺何處昔日驕鸞曉雨花  
今朝脫兔秋風樹當筵一笑却生塵累賜千金豈顧身

磨勒踏垣磼伏水精縵海蟄龍噴世上出沒幾紅線  
織夫細兒徒股戰不盡英雄草澤間教人恨殺虬鬚傳

觀唐昭陵六駿石像圖

汾陽帝子天下雄起乘六駿即六龍掃除關河玉腕雪  
芟刈隴坂花鬣風長安渭水開前殿梟摧獍殄聞酣戰  
芻料登槽徹鼓鉦陣癥著體傳弓箭人馬駭矜一代豪  
治功底定聖躬勞羽林旌旗曉色靜沙苑監牧秋雲高  
磊砢拳毛馱犇騰特勒驃武周金剛驚走趙煒煌颯霧



紫錯愕什伐赤建德世充愁辟易最好青驢骨相殊魁  
奇更得白蹄烏千官盡崩山溝域萬騎齊瘠石像圖九  
峻寢園壓幽阻太子率更題贊語形容迅奮銀甲鬪汗  
雨沾濡鐵衣舉周王八駿但周流王母樂讌崑崙丘漢  
家九駿空逸軌神駒遠產余吾水壯哉六駿古今稀金  
粟堆南又一時後代子孫曾不鑒詩人腸斷望雲驢

東吳行

我懷天地開闢初乾動神靜焉能踰女媧斷鼇立四極

鼇足峙峙交相扶窮山絕谷總一水千里萬里洗歸墟  
就中積陰不得洩日劑月盪淫為瀦似聞東吳薄海際  
天欲少畀蛟龍居驚飈捲浪類鵲沒漲霧破石疑鯨吐  
大田黍稻一以盡寧獨岸葦蕪汀蘆規撫西方失塔廟  
想像北里移笙竽甚哉善崩不可築哀爾民物空號呼  
碣石苞淪豈或有淇園下楨渾如無人言白圭過夏禹  
歲晚多凍猶徵夫爰居避風亦已久精衛銜木徒區區  
又聞杭睦二州境前者淫潦忍見屠牴憐吾嫗視龜眼

孰使汝頭真戴魚洪範五行竟不講春秋灾異何其愚  
從來妖德不相勝幸為泰階陳六符

女殺虎行

山深日落猛虎行長風振木威鬚鬚父樵未歸女在室  
心已與虎同死生揚睛掉尾腥滿地狹路殘榛苦遭噬  
豈非一氣通呼吸徒以柔軀扼強驚君不見馮婦來下  
車衆中無人尚負隅又不見裴將軍出鳴鏑一時鞍馬  
俱辟易丈夫英雄却不武臨事趙起汗流雨關東賢女

不足數孝女千年傳殺虎

揚子江頭遇仙行

晴沙獵獵吹林莽日晚南嶽命如縷延秋門上烏更啼  
揚子江頭暗風雨就中五馬一馬龍獨據滄海超河宗  
塵侵犀筋不復飫鬼瞰寶玦難為容蓬萊仙人按城堡  
蕭國芎藭何足道民族無憑指素波刀圭不用接靈草  
萬里蒼茫豈所聞須臾變滅但荒雲東南王氣今冥漠  
夢入三山見樓閣

送楊文仲典史歸餘姚

楊君東去山寵從白髮三年餘種種我來相送出江郊  
飛絮撲舟烟霧重回思始見色可挹豈恨屢往門能踵  
芙蓉映幕雲氣生苜蓿分盤日光動信知邑舍頗清淨  
疇謂民屢極單要芳春有景僅桑麻儉歲無秋徒秭穗  
微科得考寧敢問案牘持平終不擁間因武具治敕鍛  
恒啟刑書甦枯拳惟其巽入混瑕垢直以優游傲榮寵  
素鵬久蓄衣共絮瘦馬多騎骨尤聳香凝圖書居自閒

味絕葷羶食非冗且將厚本植根莖何況推仁完毳毼  
嗟哉世事更變化眼識兒郎盡珪珙臯比擁座早私淑  
筆墨專場乃真勇劒馳梁宋或操鐔弦擊邳郯行繳驚  
交游已定肯論心學習相符須貫統曩曾大海泝空闊  
聊擬翁洲覓鉛瀕蠟屐穿林草木愁蒲帆壓島鯨鼉悚  
每令故友役吟夢猶笑青年伏畊隴道途窅窅身更遠  
勲業悠悠志仍輦送君便欲東過越龍井泉頭看晴湧  
山杯一酌復愴然古曲何能效羅嘖

烈婦行

落日沉海雲壓城官軍多載婦女行大弓勁箭自山下  
顏色如灰愁上馬我生不慣生馬駒存者吾子亡吾夫  
母寧完身吐玉雪忍使餒肉當熊羆青楓嶺頭塋回浦  
血拍畫巖心獨苦老螭叩地救未及芳草迷天淚零雨  
卓哉一死可百年此事已過永泰前黃沙野塞多降骨  
忠義傳中收不得

月出東林客窻上疑梅花影

朔風何處寒梅發  
江水悠悠路超忽  
逢花不語疑見人  
對影非真却因月  
縱使無花意自同  
誰知有影色俱空  
回頭不見東林樹  
猶勝羅浮是夢中

秋月雜詩六首和黃明遠

涼露幾時白  
朔風吹鴈寒  
游俠豈不樂  
山林已摧殘  
晶熒龍尾劒  
錯落虎皮冠  
寄謝五陵子  
焉知竹路難

明月出東山  
流光射窻牖  
美人曼聲歌  
翠袖拂南斗  
別離終不常  
歡樂詎能久  
笑折青桂枝  
涼風吹我手



黃塵滿天地滄海悲鵲沒從來學仙人不在豪俠窟  
豹舄既飄飄蜺旌何翕忽因之把酒杯坐嘯青山月

西風披白蘋楚客自枯槁扳龍思上天勲業苦不早遐  
心隨落鴻短髮等衰草亦有芙蓉花嫣然為誰好

寂歷林下扉莓苔日應積少年非隱淪南陌事行役書  
劍稍猖狂衣冠多烜赫何用擊樹枝空山歌白石

代有遠游子出門獨徘徊自託羽林籍誰傾鸚鵡杯塵  
生走馬埒草上呼鷹臺極目渺滄海聊紆千里懷

次韻吳正傳觀柳林罷獵

又見天星動羽林東風罷獵總駸駸  
麒麟剪罽雕鞍密翡翠翻裙彩仗深  
三月宜春多別館百年正始自遺音  
相如縱有千金賦未必君王肯幸臨

次韻吳正傳都城寒食

悠然獨酌舞春衫千障黃塵客未諳  
鐵騎引駝沙草北雕弧驚鴈塞雲南  
太平天子回中望齊國先生稷下談  
猶有七香車幾兩曉來風雨定誰驂

從丞相花園入慶壽寺

我來燕山游俠場九衢飛沙白日黃大車高馬紛騰驤  
賓客追逐如風狂丞相花園雕玉房杏杆粉檮相低昂  
雪崖冰谷寒不僵土脈瘴盈芒樹長美人素手行瓊觴  
清歌艷舞調絲簧鸞金蝶粉醉有香燕丹遺俗今則常  
倚城孤塔屹寶坊天仙夕降飄鳴鐺青旗絳節後猊牀  
凌冬翠栢列兩行下引碧竇跨虹梁誰歟造者完顏王  
衰年上壽面生光第一齋僧厭諫章九州四海遂不康

寒煙蔓草吁可傷  
蕭然極目捐平岡  
燕南趙北天茫茫  
快騎黃鵠歸故鄉

鄒州

四月一日尚絲衣  
知是故鄉花片飛  
白頭慈母倚門久  
目斷天南無鴈歸

數株楊柳弄輕烟  
舟泊鄒州河水邊  
牛羊散野春草短  
敕勒老公方醉眠

滄州

荒亭貫酒壯心違目極東州霧雨微  
百里齊封滄海接千年禹跡濁河非  
暗塵掉馬呈金轡衰草看羊著錦衣  
猶記上年鳴鼓夜滿船燈火越歌歸

次韻傅適道虎陂開舟中

少年解唱邯鄲曲惟有垂楊夾堤綠  
夜來誰弄焦尾琴彈作東風雉登木  
虎陂開裏水生烟荆門山頭星照船  
爭似揚州春十里一雙鸞信待君傳

方養心欲游泰山用前韻作思仙詞復和之

浩歌起作游仙曲黃鶴無期瑤草綠神人結屋泰山顛  
手拂浮雲扳建木一笑齊州九點烟天風吹斷蓬萊船  
還上高丘看遠海有書莫遣麻姑傳

夕乘月渡荆門聞

初更渡荆門觸眼舟楫亂堤吏時一呼舉篙類魚貫野  
雞悄無聲行子空扼腕綠樹烟靄沈清波月光爛分涼  
短衣披習靜單幘幘岸羈愁本難祛美景聊此翫荒荒東  
原平泯泯魯濟斷歲儉管蒴繁時康萑苻散秋槎別星

河曉夢窺日觀懸知平生奇歷覽天下半長衢紅塵腥  
古調白石粲徒聚幾州鐵肯餐三斗炭人生空自憐歲  
序忽已換出門更呼車春淺冰未泮

新開河口同方養心望東嶽

羣山突兀來崑崙絳縣亘萬里如兒孫云何泰山壓東魯  
峭立獨作羣山尊高摩蒼穹幾千仞倒入巨海相吐吞  
風雲欲納制水旱日月隱見開晨昏嘗思一舉小天下  
俯視人世爭諠諠鄒嶧如錐掎遠翠黃河若帶澆餘渾

自從無懷講封禪金繩石碣半不存文園草文亦已死  
漢帝需禮終難論朝馳蒲輪木石老夜弭玉節虬龍翻  
世今極治四海謚事有未舉羣臣奔伊予遠游困羈旅  
復此翹望愁攀援偏憐靈芝太古邑不到上界勾陳垣  
浮雲微茫數尺樹落日慘澹三家村寧知東巡頌功德  
但祝南面安黎元之人素謝域中戀誰遣巫陽招爾魂  
平生空持赤玉鳥此去恐負青霞言苦吟夢入太白雪  
長嘯衣帶扶桑暎居然飄零斷地脈久矣倘恍談天根



我還呼酒酹蒼蘚笑挾服間驂羨門醉中同駕六鼇去  
何用回首悲乾坤

皂角林觀劉錡戰處

東都何慘澹南土劇蕭騷往往隳戰鬪於焉出英髦為  
君竟如寄立國已不高家供敵人賂歲奉使客艘乾坤  
忽掀簸城郭皆動搖狡兔手可攫長蛇心更饕精瑩金  
鎖甲翕艷橘紅袍厲矛終挾腕投鞭遽填壕云何大兵  
壓尚謂和好牢白波橫天險清野捲地毛將營皂林斫

軍艦采石鏖大星遽崩殞滄海爭遁逃向非伊人在久  
矣淒煙蒿龍虎空野競狐狸遂寒皁信史獨未著奇功  
果誰褒因之懷舊跡一弔楚江臯

風雨渡揚子江

大江西來自巴蜀直下萬里澆吳楚我從揚子指蒜山  
舊讀水經今始睹平生壯志此最奇一葉輕舟傲煙雨  
怒風鼓浪屹於城滄海輸潮開水府淒迷灩澦恍如見  
淋滉扶桑杳何所須臾草樹皆動搖稍稍鼉鼉欲掀舞

黑雲鯨漲頗心掉明月貝宮終色侮吟倚金山有暮鐘  
望窮采石無朝艣誰歟敲齒況能神或有偃身言莫吐  
向來天塹如有限日夜軍書費傳羽三楚羈民類魚鱉  
兩淮大將猶羆虎錦帆十里徒映空鐵鎖千尋竟然炬  
桑麻夾岸收戰塵蘆葦成林出漁戶寧知造物揔兒戲  
且攬長川入樽俎悲哉險阻惟白波往矣英雄幾黃土  
獨思萬載䟽鑿功吾欲持觴酌神禹

送方養心歸餘姚

切切復切切行子慘不悅嗟此四方志出門彌激烈孤  
蹤眇泗沂遠眼窮恒碣急吹半天來曾冰千尺裂高車  
少停輪健馬空嚼雪雄劍彈無聲敝衣不得結魯鄒誰  
學經齊趙幾奇節商歌敲樹枝漢禮表茅莖向時曾買  
舟一往脫羈紲汴流入汪洋廬阜陵嵒嶠棄家洗塵埃  
求道希老耄微煙錦囊解宿露瑤草茁故國尚遺雉前  
王多覆轍夷門迷戰區良嶽守孤孽輕鞍小駟殘勁矢  
天狼折肯動箕子歌虛貽晉人呌從來識時務往往在

俊傑神仙真繆悠民物正騷屑茲游固云佳所學終不  
竭縞髮寧恕人寒燈遽明滅歸尋赤城幽坐視滄海洩  
遙空飛胥濤厚地圻禹穴窮冬息山樊長夏仍擲黿那  
能事輕舉但可容踈拙一笑同越吟毋煩用燕說為君  
看白雲還記此時別

至杭聞胡汲仲先生沒去秋奉樞建昌

我舟東至杭直下追落鵲悲風吹白蘋胡子聞已卒昨  
秋載樞去素紼照揚粵卜茲建昌城無地可埋骨上天

果何心者舊半已沒英豪氣俱凋蓋壤名獨兀斯文西  
漢來大旨六朝劫其間雖振之與世每摩宰紛拏曲學  
阿磔裂淫辭涵穉飈劍蒯緌幻彩衣繡鬢聖經黯日晶  
賢傳頤烟燂終無萌蘖生就此斷蓄慶嘻公追古先曠  
視眇窮髮陳言去如遺至理昭若揭遠唳泐寥孤撐  
植摧杙舜韶資搏拊般斧賴剗剔以茲白谷遺而有金  
鑾謁調琴空縑帷揆賦止鍛斲征塵恒碣濛教雨淮海  
淳守儒終勦剛從仕類燦發澆鹽數泥銍飛檄招島筏

幸馬櫛民垢殊莫裨主闕平時負韋素晚節老佔畢佳  
友將米醪野僧獻衣襪盱眙耳鶴泉眼眈目鯨月生為  
列仙臞立謝豪俠窟似子本疎庸為士非詭崛持衡乃  
藻鑑泛駕略銜駟同門溢江漢共道耀參伐將令異虬  
肆肯使增獸狘于今我多慚固已遭一刖情結餘舊醴  
軒騫豈黔突將來杳微茫逝者真吐吐宜哉貞耀謚稱  
彼甘棠笏公往知我誰翻然採蠨蟻怛悵西北雲從以  
泛溟渤

寄柳博士

試續儒林傳南州定幾人清標騰鳳翼素手截鯨鱗卓  
犖初觀國軒騰早致身燕秦爭騁俠鄒魯共稱醇旅劒  
渾如淬家氈在一振於焉徵有道自此教成均學術諸  
生識才名六館親土牀然燭夜苴帳給餐晨上下笙鏞  
間縱橫俎豆陳岐原周鼓老闕里魏碑真白日需前席  
青雲仰後塵山林稽猛駁文字到祥麟豈獨呻佔畢猶  
應逐縉紳討論抽秘典扈從得良臣絕漠幽洲暗滄波



碣石隣鸞旗飛旖旎革輅壓輪囷御苑材官集離宮突  
騎巡赤狐翻遠譯黃鼠割時珍法酒蒲萄熟天花芍藥  
春朔風沙鶻健衝雪野馳馴北海誰求隱東都或對賓  
三關寧設險八極揔歸仁悵望懷今古賡歌邁等倫短  
衣曾見寵長鉞每忘貧共往仍聯駟同吟更接茵玉山  
森巨石金水濯芳津本擬追枚乘終然愧卻詵鹿鳴來  
已再鵬擊去何因色挺淮王桂香生楚客蘋聖朝初薦  
士江漢有垂綸

寄吳正傳

自昔攜手燕南門長風洒雪衣不溫向來所見夢一覺  
今縱欲語舌復吞日斜忼慨與子別班馬跳躍東西奔  
色摩中州翠嶽聳波濯列壤黃河渾指麾齊秦擊快鶻  
凌厲楚漢抽枯黿彼雖失矣幸得此英氣挾酒猶飛騫  
常憶仲春大羽獵九衢絃直歸乘轅綵女紛行引樂伎  
材官夾道羅弓韃須臾紛騰一萬騎足所未及塵為昏  
中使計功促筵秩崑崙玄圃惟目存威鳳文章條能集

祥麟郊藪將不諠信知天邑自壯麗誰使游士爭扳援  
悲哉小草有遠志隨即大挫栖丘樊恢奇俊偉莫子若  
便可上拂勾陳垣來乘東楚又一載此地聞舊稱雄藩  
居民雜作他郡劇治道小試平生言秋行荒墟翠稻實  
夜艤巨漈明珠燉定應矯首謂子懶青桂無花能返魂  
幽屐穿林鸞鵠唳大瓢挹海魚龍掀達須出仕窮且隱  
肯以一腐終乾坤

一笑

一笑長竿折徒憐大海魚文章猶醬瓿塵土只鹽車白  
日燕臺劒清風禹穴書上林誰獻賦愁絕馬相如

范蠡宅

淡淡寒雲鶴影遶荒山故宅忽千年大夫已賜平吳劍  
西子還隨去越船白石撐空留罔象青松落井化蜿蜒  
徒憐此地無章甫只解區區學計然

烏震古錢

烏震何年自鑄錢偏爐發冶光燭天方園肉好本不變

百萬戍卒橫戈鋌鎮州城南塵霧起雖有忠臣無孝子  
殘膚毀鼻遣還軍老母孱妻傾淚水一時富貴千載兇  
摹為騎將空英雄天子真傳內藏竭小臣別賜銅山銅  
似此頗期邦國活却因貨利專生殺但能擲地作金聲  
九府終存太公法

聽客話熊野山徐市廟

大瀛海岸古紀州山石萬仞挿海流徐市求仙乃得死  
紫芝老盡令人愁就中滿載童男女南面稱王自民伍

蒼劍凌天化曉雲鐵船赴壑沉秋雨琅琊臺上望欲空  
日出未出扶桑紅魂漂三神入夢幻淚洒萬鬼爭英雄  
真人獨見阜鄉烏奉使遙傳鎬池壁桃源草樹同一春  
紆嶼蛟龍散無迹古往今來亦可憐世間何處有神仙  
文成五利猶騰說不惜秦年惜漢年

題朱元暉青山白雲圖

一簇空濛杳靄間  
崑花冗葉鬬爛斑  
若為看盡雲生滅  
還我青然萬古山

題李西臺真蹟

去矣昭陵瘞帖空西臺筆力到江東知渠尚賴毛錐力  
氣壓長槍大劍中

